

近代中國史料叢刊續編第九十八輯
沈雲龍主編

粵閩巡視紀略

杜臻撰

文海出版社
有限公司
印行

粵閩巡視紀略

粵閩巡視紀略卷五

工部尚書杜臻撰

癸酉行三十里至洛陽橋又三十里過惠安縣

元年畫界自洛陽橋厯石任寨

下山金山下曾山文筆山柳庄溪石寨邱戶

村至九峯寨為惠安邊邊界以外斗入海四十里黃

崎灣三十里崇安所峯尾二十里白沙獺窟十五里

橫頭澳皆移共豁田地一千九百九頃有奇於石任

諸處因界設守八年展界安兵十八處

石任五十名白沙尾十名

烏石山十名埔塘把總一兵七十名獅捲山十名岩
鼓山十名古樓山守備一兵一百二十名鷄母山十
名東吳埔十名許山十名承天山十名東坑山把總
一兵一百名後張山十名龍田山千總一兵一百名

白井山十名前塗山十名九峯十名南莊十名今從惠安營撥守七汛崇武所千總一兵四十名小岞把總一兵三十名獼窟二十名黃崎澳二十名輞川十名峯尾澳三十名沙格澳二十名候閱定

宋朝會要云太平興國六年析晉江地置惠安縣於螺山之陽其地故為三國吳將張梱墓徙之青山而置署焉今縣庫即梱葬處也有古縣基在龍窟嶺而真如溪發源橫溪東至龍田又南至古縣入添崎港今龍田古縣皆置戍此縣治不知何代所置石船山在洛陽江北山頂有奇石如船明邑今葉春

有詩云石船高駕碧山頭似畏風波急暮流十二時
中平地起問君何處不堪愁又木蘭為楫桂為橈南
接端明學士橋我自虛舟人不識海門風雨日瀟瀟

今訛為

石任山

鳳山山形如鳳掠海濱三國吳將黃興葬其下時見
靈異里人廟祀之宋淳熙間海寇犯小兜大岬忽有
兵馬聲自廟出寇不敢犯一境得全紹定間聞於朝
封順濟侯

樓山環縣治一名留山

烏石山一名靈鷲山上有清泉石室蔡忠惠嘗讀書於

此有伏虎巖宋祥符間僧道養居於巖下與虎狎習
夜寢其穴時抱虎子示人巖以此得名稍南有五公
山梁時五公隱此曰唐公寶公至公化公朗公也山
有石鼓似即岩鼓山蓋岩鼓當作石鼓也稍北有塗
嶺以涂姓兄弟三人沒而為神宋淳祐間賜號昭惠
故名前途之名似亦緣此也

大聖山東臨大海堪輿家謂之大象捲湖有嶼曰樂
嶼在海中饒林麓之美明初徙其民入內地
似與相

下曾溪源有二 出上曾溪過上田小橋一出上范

溪過上田大橋會於充口入馬山埭

陳平山唐時有堪輿家曰陳平騎牛而化葬此山

似即陳坑

文筆山三石錯立如鼎耳舊名香爐或積石於兩耳刻其中謂之文筆對學宮之前

九峰山在文筆山南峰有九斷續向背若蹲獸若盤螺或翼而翔或俯而伏立而拱

輞川鎮在縣治東三十里支海中之孤嶼也縣治東面大海南為洛陽江之支海而輞海自東盪其脅峰崎港自縣北來合之凡為縣西北之水曰菱溪曰驛

坂曰芟布曰龍津白南坑皆滙此港峰崎山竇當其衝縣之水口山也山之北有橋曰青龍宋僧道詢所建港又東入於輞海鎮與內峰僅隔一水舊以舟渡人衆爭先數至覆溺成化間縣令張桓作橋曰輞川橋鎮民數百家以賈海為業嘉靖間苦倭縣令陳玉成創為城而後令蕭維美成之東西南各一門北小門二東小門一其外有竿嶼

崇武所在大岞山縣東南極境也為二十七都地故設操屯軍千二百二十一名東面距海南對泉州之祥芝北望興化之湄洲泉之上游也北至平海南至

永寧日湖泉州港各一潮水澳中藏北風船三十餘
宋為小兜巡檢司永樂間邑有倭患始築城并築壘
窟小岬黃崎峰尾四城聯絡扞守於外焉嘉靖末陷
於倭萬厯己未復為海寇所躪少北為大岬澳可泊
南風船二十餘夏至後賊嘗伏此狙伺北來之商最
稱險要山多小石如鐵色扣之作磬聲山南有洞朗
豁可容四五百人旁一小門僅可側身入入丈許右
轉有大石當道如屏內更寬廣民避寇者多往焉又
有石倚江渚齷齪如龍名龍喉山海中產龍蝦一名
蝦杯一名蝦魁大者五色次者名蝦姑泉人謂之青

龍最小者曰苗蝦嘗對插之曰對蝦王世懋閩部疏
曰長五尺其鬚四絳長半其身睛凸出上隱起二角
負介昂藏形似小龍尾吐紅子如榴花色開元遺事
載其名狀云如蜈蚣尾如僧帽又生沙參歲饑居民
掘之可飽數日旁有青山即張梱徙葬處相傳梱生
時嘗屯兵是山以禦海寇改葬時得銅牌上有文曰
若逢崔知縣移我上青山遂移於此虞允文拒金兵
於采石見空中有大旗題曰張將軍青山人從軍者
為言梱事允文聞之朝賜勅封景炎間累封至靈安
王

獺窟嶼在崇武南十里邑東南三十里為二十五都地可泊北風船四十餘故設巡檢司北障前頭山南縈覆釜厯祥芝岱嶼可入泉港寇至舉烽內外警息嶼北有橋七百七十間潮至即沒潮退可渡宋僧道詢所建

小岞山在大岞之西北去縣四十里亦二十七都地故設巡檢司城立山巔四面環海特出海上有洞可容數百人嶼前後皆灣澳賊氛窺覷所時至也宋時李陳二姓居之李之先有曰文會者宋建炎中進士厯殿中侍御史權叅知政事陳則自侯官徙兩族皆

勤儉守禮為郡邑所矜式地產紫菜其生粘石上潮至則鬚鬢搖漾嫩者搓之成索曰索菜生時正青乾則色紫即吳都賦所云綸組紫菜也稍西十里曰淨山一名尖山亦瞰海多怪石如水齧最高而削拔者三登之可見日旁有石竇中空洞可居今湮廢矣產朱丹石宋僧道詢生此

黃崎舊名靈崎在縣東三十里為三十二都地故設巡檢司高山特起三面瞰海南鄰小岞北與峰尾隔海對峙如川而輞海貫其中至輞川鎮一潮水商賈所集東北與湄洲南日遙相望也崎下多礁賊舟不敢

輕至滷氣所侵草木不茂土色微黃故名黃崎又以
勢如立旆故名揚旗地產鐵宋置鐵鑪

峰尾澳蓋峰崎之尾也故有巡檢司北障沙格南距
黃崎與興化之吉了湄洲相犄角賊船多泊於此巡
兵番汎焉自左支一潮入於楓亭

是日又行五十里止仙遊之楓亭驛

興化府屬縣二皆臨海曰仙遊曰莆田莆田附郭元
年畫界自九峰寨歷楓亭驛梅嶺至壺公山尾為仙
游邊邊界以外附海二十里東沙十里厝頭三里陡
門皆移共豁田地八十一頃有奇八年展界安兵三

處楓亭寨把總一兵二百二十名塔頭十名東沙十
名今不設守候開定唐嗣聖間設清源縣於大飛山
南天寶間別駕趙順正謂縣名同郡為非是奏改仙
遊以其地有何氏九仙遺蹟故也宋紹興間始築城
峰尾莆禧之間海支內入仙遊當支之窮處其海中
有小嶼故設巡檢司嘉靖間以邑之白隔嶺多盜移
巡司以防之東沙諸境即小嶼內濱海地也
楓亭驛在錦屏山下有楓亭市亦以九仙得名九仙
豫章人生漢景帝時兄弟九人皆盲獨長者有一目
父曰何翁與淮南王遊九仙勸父俱隱不從遂相與

入閩初居福州于山已而遊莆至西州謁胡道人飲
以所居并泉九人眼盡開乃西行六十里結楓為亭
以居此地所由名也後又入九鯉湖湖在山之東重
山疊巘怪石交列湖底皆石石各有穴環屈相通深
處不可測九鯉潛其間九人煉丹湖上鯉餌其餘鱗
鬣皆成朱色昂首噴沫湖水為溢勢欲飛舉九人各
乘其一以上昇旁有九漈曰雷轟曰瀑布曰珠簾曰
玉筋曰石門曰五星曰飛鳳曰碁盤曰將軍皆名勝
也楓亭溪源出阜洋合吳坑赤湖蕉溪諸水匯為沙
溪至太平港有溪海會流石刻蔡君謨筆也港之南

有陳洪進故居

壺公山一曰壺山接莆田境九域志云昔有隱者遇
老人遷至絕頂見臺殿宮室非人間老人曰此壺中
日月也後乃因以名山前志云有陳壺者隱此得仙
故名或曰乃陳胡二仙胡即九仙之師也莆西有靈
潭廟井泉猶在即胡仙為九仙療眼處今其地猶有
陳胡里云山高千餘仞方銳如圭首峙立如展旗有
真淨巖登之可眺一郡諸山又有虎邱巖宋徐思仁
云凡山居以怪石奇峰走泉深潭老木嘉草新花視
遠為勝獨壺公虎邱巖能兼之又有靈雲南泉竹峰

諸巖及桃花洞蘸月池盤陀石法流泉濯纓洺石壁
峰碧溪灣又有蟹井泉出石穴中其脈通海視潮盈
縮中有雙蟹每旱禱雨以茅葉引置缶中迎歸即雨
宋彭乘墨客揮犀云壺山有柏一株長數尺半化為
石蔡君謨見而異之徙置私第山為一郡之鎮朱晦
翁過此指謂人曰莆中人物之盛乃此公作怪自蔡
君謨興水利灌民田引水繞壺公山自是科第視前
益多元郭完隱此與方時舉二十二人結壺山文會
有集行世有龍潭在壺山之西弘治志云元時有范
氏養馬潭邊馬與龍交而生龍馬事聞於朝詔取之

馬至大義鎮念母一馳即歸范氏為其所苦因殺之
甲戌行六十里至興化府又四十里止江口寨自寨東
行二里即內海也

元年畫界自壺公山尾厝壺公山首天馬山清浦村勝塔至江

口為莆田邊邊界以外斗入海六十里莆禧所古廖

五十里平海衛附海十五里南酒林十里下尾三里

東雲及江口勝塔兩岸海灣之村若勾上上皇港東

珠浪等皆移共豁田地四千四百三十頃有奇於勝

塔等處因界設守八年展界安兵二十一處東港山十名東

雲十名白沙千總一兵二百名塢頭山十名陳店山十名後架把總一兵九十名陳墓守備一兵一百八

十名 忽石山 十名 馬山 十名 天馬山 把總 一兵 九十
 名 鄒會 徐十名 惠洋 十名 五龍 十名 東華 十名 海濱
 十名 竄海 楊十名 總一兵 二百 十名 白墓 把總 一兵 一
 百 四十名 張井 十名 鹽塢 十名 岸勝 五十名 周堤 尾
 十名 江口 橋 把 今從興化營撥守 十七 汎 涵江 平海
 總一兵 九十名 青 山 把 總 一兵 七十名 嵌頭 五十名 美爛 三十名 盛
 海 倫 千 總 一兵 四十八名 東華 二十一名 百美 寨 把
 總 一兵 七十名 岸勝 寨 把 總 一兵 六十四名 南埋 八
 名 白墓 八名 張井 八名 東蔡 寨 兵 四十一名 後郭 五
 名 馮峰 六十名 忠門 汎 十 總 一兵 一百名 蕭 侯 閩 定
 籍 所 六 十 名 吉 寥 寨 把 總 一 兵 六 十 五 名

宋乾德二年置平海軍於清源郡即今仙遊縣地也
 其地有游洋洞多盜賊太宗置興化縣以治之尋又
 改興化軍遊洋在仙遊縣之興泰里至今俗稱舊縣
 閩書以為即平海衛者誤也太平興國八年徙軍治

於莆田縣洪武元年改為興化府莆田以地產瑞蒲而名後乃去水為莆陳天嘉二年章昭達敗陳寶應於莆口即其地也隋開皇九年始置莆田縣唐嗣聖間析莆田置清源郡府治既徙仍以莆田為附郭縣云

天馬山即塔山在莆田里一名文峰巖巖下有伏龍穴明御史朱泚居之有天馬賦序云壺公東分一支屏翰海上列為五侯復折而西行隱見起伏且數十里結為文峰端偉秀拔飛動不居有天馬行空之勢故名賦云越嶺徼破闔荒望莆口過游洋挈入壺之

右派造五侯於上蒼靡然東馳忽焉西顧挹穀城之
仙風愛沙堤之烟樹擷錦園之芳蕤擢銀塘之橫素
島嶼明滅滄桑朝暮東五里為城山亦曰黃石山下
有黃石市山形如植笏蓋即所謂忽石山也本名國
清山又訛為穀城山五侯山正視之五峰側視之兩
峰自郡城視之三峰故又名雙鬢亦名筆架也迤邐
入海為持久山海中突起二嶼一青色曰青嶼一赤
色曰赤嶼皆如覆釜

白沙溪在新興里發源鐵嶺白雲鼓角諸山至大山
西合流北行與大溪合白雲山在南白沙之南鼓角

又在其東北觀如鼓南觀如角北行為九龍潭山分
九支曰九龍山蓋與鼓角為一山也南望即大海

東雲蓋東陳之訛也其地有浮山在靈川里近海下
有東沙村地連仙遊唐長史陳琨居其東曰東陳元
陳紹叔居其西曰西陳

五龍廟在常泰里入瀨溪上亦曰碧瀨又名鼈瀨昔
有黑白二龍現故作廟祀之地多奇石秀膩巧琢如
青玉或中裂一罅如甬巷或平展如田或楔入如車
軌或陷下如履武蹄泔捫而行拂以卧淨滑可喜蓋
皆海水盪瀾而成也瀑穿崖隙漚為潭蜿蜒澄泓激

視沁骨土人侈為奇勝云

海濱地名有嵩山上有嵩山院院後石壁苔紋成文
筆峰三字刻去復存其旁海中有小嶼潮退有石橋
可度居民千餘家唐觀察使柳冕監羣牧於此有德
於民建廟祀之曰柳侯廟宋余謙一作記俗呼為侯
嶼後遂訛為猴嶼閩書曰即仙遊之小嶼也

惠洋疑即龜洋其地有龜山在文賦里唐末僧無了
居之有六眸巨龜足躡四龜如俯仰作禮者三遂卓
錫焉因名其地曰龜洋熙了闍封真寂大師塔曰靈
覺

東華溪在連江里石貫其底旁有東華村唐梅妃村
中人也姓江氏九歲能誦二南詩父仲遜奇之因名
采蘋開元中高力士使閩選進明皇一見寵幸性喜
梅因號之曰梅妃為楊妃所妒遷於上陽東宮作樓
東賦以寓意一日上封珍珠一斛賜妃妃不受以詩
付使者曰桂葉雙眉久不描殘粧和淚浣紅綃長門
自是無梳洗何必珍珠慰寂寥上覽詩悵然令樂府
度為新聲號一斛珠明隆慶五年有二龍起海中擁
水高丈餘濶數丈長亘野聲若崩山其一飛升天半
長數十丈準角崢嶸身若水牯色正白鱗鬣蠕動歷

厯可數忽有片雲正黑從西北來龍乘之以升遂不復見其一浮游田禾之末北渡洋水田中水旋卷隨之至白石岬中水躍數丈西北行經東庭至東華之忘饑亭埔下而入於潭所過雲氣噴薄聲若雷霆而草木不損片葉焉僉事余一鵬為之記

遮浪村在連江里疏作東珠浪語訛也有大孤嶼小孤嶼大孤嶼者海中有大石突起亦曰大龜嶼嶼東有石盤上有巨人武

黃卷山在延壽里疏作上皇港傳訛也地產荔枝名火山五月先熟為莆之冠唐校書黃璞與從弟滔移

居於此黃巢寇闖所過焚蕩至此戒其下曰儒者家也滅炬而過滔有寄璞詩云縱徵終不起相與避烟塵待到中興日同看上國春新詩說人盡舊宅落花頻移覓深山住猿啼作四鄰正字徐寅有黃校書閒居詩云取得驪龍第四珠退依僧寺卜幽居青山入眼不干祿白髮滿頭猶著書東澗野香添碧沼南園夜雨長秋蔬月明掃石吟詩坐諱却都無擔石儲山名黃卷以此蓋訛為黃港久矣疏又訛黃為皇也

寧海橋在連江里支海自下黃竿入三江口經渡浪大小孤嶼而入兩涯洪濶北涯舊寧海鎮鎮前有渡

元元統中僧越浦為橋曰寧海明徐敬則僧湘江重
新之更入為白湖一名玉湖土人用讖言作橋以斷
水鄭叔儵詩云結駟直過黃石市連艘欲斷白湖腰
謂此也舊有堤俗名白水塘其側有靈惠井環境皆
斥鹵此獨甘冽

江口橋在待賢里支海自三江口又入接迎仙港迎
仙溪合荻蘆桃源白石諸水東流至此而與海會也
其地江勢最濶有盤石突起江心民居集焉於此作
橋名江口橋一曰龍津橋一曰尚陽橋橋之南屬莆
田北則福清境也其旁迎仙巡司在府治東北四十

里前臨海後負江口橋地饒民聚商賈所湊相傳其上更有迎仙橋為宋僧祖遜所建今地有子魚潭亦名小姑潭宋志子魚惟迎仙橋東小姑潭所出為最但少通三即者建安嚴子翼藝苑雌黃云通即長魚古人以為食珍言其大可容印王荆公詩長魚俎上通三印之句而子瞻亦以通印子魚對披綿黃雀皆用此意王彥輔塵史云子魚長七八寸濶二三寸出通應港者佳蓋港上有通應廟因以名港耳後人訛為通印見之題詠不足據也閩書則又云絕無通應港及廟妄人詭飾社祠顏以通應至今存焉港水下

流曰錦江即江口有溫湯池漢時胡道人者煉藥於此藥成有神人告之曰非太上之藥也不足以度世道人棄丹於池池水遂溫相傳浴之可以益壽

吉了寨巡檢司有城在新安里宋曰擊蓼距郡城八十里前控南網右引小嶼左帶湄洲內通楓亭諸處外至莆禧一潮水其城枕海浹巨浪衝噬歲費修築下有東西二澳內泊南北風船二百餘隻東有吉了水寨南日寨及湄洲遊總向來移駐於此有華胥山或云吉了者猶言極了謂莆地至此而極乃復崛起為是山與湄洲隔海相望時見蜃氣成樓臺也居民

甚稠以賈海為業歲出海不下千艘倭寇每於南麂
礮臺狙伺之或分其所獲給粟而遣行或并船奪之
姦民外苦倭掠內虞巡兵然以微利故往往走死如
驚或竟習為不軌使帆輕捷逐之殊難也吉了之船
釣槽夾底最利深洋用以巡邏最便莆禧所故設旗
軍千二百二十一名在湄洲之西北平海之西南為
興化東南藩蔽三面阻海頗稱險阨澳內藏北風船
三十餘自莆至中門為地極處一線僅通左支自賢
良港而出吉了散為東湖西亭諸山右支自金沙鋪
而東出莆禧散為文甲山柄諸山中門疏作忠門賢

良港在所城前有山屹然如象本名黃螺港美其名曰賢良焉文甲山一名門夾山以兩山相夾如門故山柄墩城北澳也亦曰後山柄可泊南風船五十餘其民習海勇鬪而約結甚固嘉靖壬戌寇陷郡衛獨所城得全南至平海北大咋各半潮水

嵌頭巡檢司在郡城東九十里城在石崖之嵌漁農數百戶雜居其址介山海間賈舶寇船來往雜沓頗難稽詰

平海衛在府治東九十里屬武盛里開海實錄孤懸海外三面臨淵惟西北一路可通莆陽之藩蔽也洪

武間周江夏置衛築城有旗軍五千五百十六名設
學地有石獅九跳鳳石諸山衛前小澳四面皆石有
石鼓石鑼孤峙磧上鼓周三丈鑼差小扣之各如其
聲又有大泉在城東二里自石罅湧出澳中可泊北
風船百餘東一嶼浮海曰鸕鷀嶼閩海實錄可泊南
風船二十餘又有進嶼進嶼兩島如門洋船所出入
也門之中及嶼之西南皆有沉水礁過者戒心焉嘉
靖三十一年壬戌郡城衛連陷於倭先是歙人王直
入日本糾薩摩州倭以入寇賈人子徐海亦集眾從
之寇擾江浙數歲嘉靖三十四年冬犯莆田及鎮海

鎮東諸衛泉州指揮童乾震拒戰死之此閩中被倭
之始也已而賊復犯浙應天巡撫胡宗憲用間殺海
復計誘直誅之宗憲以功擢右都御史兵部侍郎加
太子太保而直之餘黨毛烈知尚據浙之舟山巢柯
梅閩浙諸境歲有寇患而閩中失亡尤多巡撫阮鷄
坐罷三十七年烈知自柯梅徙泉之浯嶼入南澳構
巢以居於是興漳泉三郡無地非寇三十九年破永
定城又破寧德縣殺叅將王夢麟知縣李堯卿奸民
導賊發巨姓塚墓質其棺以索贖諸將冒功飾敗賊
益枝蔓浙江叅將戚繼光奉檄來援賊方據寧德之

橫嶼阻水為營繼光填河以進斬二千餘級生獲九
百人連破六十餘營賊少靖矣迨繼光返浙而賊又
熾四十一年新倭大至犯福清羅源連江殺遊擊倪
祿十一月遂犯興化郡城郡故饒裕賊艷慕已久至
是乘高急攻盡得城中虛實木蘭陂水注城中爨浣
仰給賊徙其源民無所得水大困會總兵劉顯來援
衣甲俱刺天兵字賊邏得齋書者八人殺之而衣其
衣以入守者勿覺也夜半斬關納寇城遂陷同知奚
世亮死之焚掠搜牢火經旬不滅盤踞兩月見城中
腐骸山積腥穢不可居遂去之平海乘不備急攻又

下之事聞上震怒罷巡撫游震得以叅政譚綸為僉都御史代之更調廣帥俞大猷浙帥戚繼光協力討賊興化之初陷也巡撫震得檄指揮歐陽深率所部降盜謝愛夫等駐瀨溪以防其侵軼深泉州人也子模已未進士深以貲豪里中慷慨好施人懷其惠會寇難糾眾保聚愛夫故助倭發塚深先墓亦與焉深遂率眾攻愛夫愛夫驍銳多黨翼號謝半番聞深至而憚之遂聽撫至是深率半番追倭於平海之蘇塘中槩死半番裹其屍而還時為四十二年之五月也是時戰死者又有在籍總兵鄧城泉州衛鎮撫白良

玉事聞深世襲指揮良玉子准署指揮同知巡撫綸
至用總兵俞大猷議分其軍為各萬人總兵劉顯攻
其北浙總兵戚繼光攻其東而大猷當其南又令二
叅戎以舟師截水道四月倭將遣把總許朝光率輕
舸邀之不得出居亡何諸將四面雲合蹙之崎頭倭
殲焉衛有忠勇祠二祠本衛千戶邱珍葉巨卿皆剿
倭陣亡者

涵江有涵頭舖宋學士鄭頤吉居之與文文山相友
善為書新有社三字有涵江書院在郡城東北二十
里唐貞元間宣聖四十一代孫孔仲良徙居此宋紹

興乙亥朱文公常過其家見其裔孫宜去孔子四十
九世矣有唐告身七通及家牒猶存為告守臣傳自
得令兵鐸更其版籍淳祐中知軍楊棟同涵江鎮官
鄭雄飛作書院并夫子廟理宗御書涵江書院四大
字以賜之元設山長以五十三世孫敬山克之子孫
世襲至明始罷

青山巡檢司在郡東九十里三面阻海南日山峙其
南不及五十里莆門戶也產相思石亦曰雌雄石狀
如杏仁而白擘之兩瓣腹有紋置盤中沃以醢則石
瓣離立相對俄合為一矣有大蚶山志稱昔有物自

海浮至輪困如瓦屋蓋蚶也土人作廟祀之因以名
山上有大動石小動石石船石獸之屬舊志上有岩
洞十里之內水草皆香旁有蚶田百頃南至崎頭二
里許有羅隱廟相傳常有巨木數百章自海浮至盡
鐫羅字鏟之愈明土人獲而異之逾日見有神人戴
冠黃袍曰我羅仙也言訖不見於是立廟以祀海商
祈風能分帆南北南唐封廣濟王有蔡山壺山之分
壠也今置戍

演嶼與蚶山相近宋少帝舟舶大峽江為元兵所逼
忽有白馬神為演一嶼一蔽帝舟遂免石刻猶存

南日山在青山之東大海中與琉球相望舊名南匿
唐翁承贊有泊船南匿遙望竹嘯舊山詩週百餘里
閩書環嶼
二十里舊有居民中湧淡水寇常汲於此明初置
寨曰南日寨設戰艦四十六兵八百七十六名成化
末徙吉了居民無所依相率內徙其山遂空山之東
北澳曰東滬泊北風船四十餘最當賊衝其西南曰
西寨泊南北風船四十餘北連一嶼曰小南日周七
里不可泊船北澳曰燕內可泊南風小船十餘又有
大小礪山在海中自外小嶼鱗次惡礁甚多曰十八
門皆賊藪也北至東甲南至烏坵各一潮水北與小

埕寨會哨於南茭南與浯嶼寨會哨於湄洲

崎頭北望南日在青城之西澳內可泊北風船百餘
但苦潮退膠淺大船不可泊東北澳曰泥滬可泊北
風船三十餘東北洋中一小島曰三蓬嶼北至龍王
宮南至東海各一潮水

冲沁巡檢司在郡治東六十里三面阻海與崎頭三
江澳港相接即山為城下多村落海上烽起則歛民
入守其民歲販飴糖稻麥浮溫台泉潮為利

湄洲一名飾山居大海中周八十餘里在崇武之東
北平海之東南距郡城八十里為莆禧吉了門戶與

琉球相望故有居民洪武間徙而墟之山有甘水茂
草野馬驢驟孽產蕃息驟逐之不可得有勢家居之
以為利寇舟常就汲焉隆慶初設把總一員戰艦二
十三遊兵五百二十八名以守之後裁改設標遊西
為蟻仔埕泊南風船二十餘東南為金沙澳可泊大
船五十餘文甲門商漁所必經賊常於此候刦外為
深澳水深多網柱賊船所聚也北至平海南至崇武
各半潮水大岫小岫其汎地也有順濟天妃廟妃姓
林氏父曰愿闔王時為都巡檢土人也妃初生地變
紫色長而靈異能履席渡海往來諸島間人呼神女

或曰龍女一日方織據機假寐終日乃覺母詢其故
曰父有厄往救之耳未之信也有頃父至言涉海遇
颶風幾危忽見有神女擁輜輶幡蓋現空中而風遂
息僅乃得免母始異之而土人緣此益知其非常人
矣在室三十年至宋雍熙四年無疾奄逝妃既沒土
人時見其衣朱衣履浮槎出沒巨浪中身有光又數
見夢於父老遂作廟以祠名其墩曰聖墩宣和中給事
路見迪使高麗遇風以妃見於舟得濟使歸以聞因
賜順濟之號其後屢著靈異元明間皆有翊護海運
之跡累加勅封益尊稱至十字永樂初中官鄭和

使西洋又見光怪成祖命有司新其廟遣官致名如
之顯靈幻竒不一或見紅燈自空墜或見彩蝶繞樯
飛成化中給事陳詢使日本嘉靖中給事陳侃使琉
球皆有所見云今頻海郡縣往往有祠每冊封外藩
必致祭費舶事之尤嚴也湄洲之廟至今宏麗每農
月耕民夫婦畢出常以襁褓裹兒置神座下竟日不
顧兒終不啼若或撫之者山產黑白搏石可為碁子
宋林光朝與林晉仲書云海中一山名湄洲隔岸視
之約五七里乃合兩山蜿蜒之狀有田數十可耕而
食魚鹽饒美築室讀書可以忘世惟某知之也此島

自唐以來居民稠密洪武徙後時復闢出蓋以承平不之禁今猶如故云

烏坵山周二十里在平海東洋中二山相連北曰大坵泊北風船三十餘南曰小坵泊南風船二十餘水深二十五托澳外水深三十托用坤申針二更至湄洲山日本塘船東番歸棹皆泊此取水候風蓋賊藪也係中路哨探汎地

乙亥自江口驛過蒜嶺行八十里至福清縣自縣東北行十里至鍾山登其顛望海壇山鎮東衛諸處薄暮而返

省城福州府屬縣七閩縣附郭附海者五曰福清曰

長樂曰閩縣曰連江曰羅源元年畫界自江口橋厯

仙嶺蒜嶺驛綿亭嶺漁溪舖玻璃嶺松樹嶺蒼霞嶺錦屏松潭山牛宅村里美至定軍山

為福清邊邊界以外斗入海八十里萬安所七十里

牛頭寨五十里澤郎寨四十里松下十里鎮東衛附

海五里海口橋上運鎮二里硤窰俱移共豁田地四

千六百三十四頃有奇於海口橋東大石漁溪舖蒜

嶺驛凶界設守八年展界安兵十七處峰頭把總一

嶼二十名旗山二十名蒜嶺把總一兵六十名棉亭

山二十名九龍山後千總一兵一百八十名西嶺三

十名松樹嶺二十名葫蘆山把總一兵五十名杞店

千總一兵一百三十名松潭二十名鎮東衛遊擊一

山海經見已各分之二

卷之二

守備一把總二兵四百五十名麒麟山二十名山今
下把總一兵五十名風水山十名定軍山二十名今
從蒜嶺營撥守一汛峰頭把總一福清營撥守二汛

候閱定

福清立縣始於唐初名萬安改名福唐後唐莊宗始改
福清其東南隅皆海也故遷界自西南以抵於東北
自江口橋五里至仙嶺又五里下埔又五里蒜嶺又
五里棉亭又五里蘓陰又十里漁溪皆自南而北由
此折而東行十三里玻璃寨又十里洋尾又二十里
至縣南門又二十里海口橋折而北四里牛宅村又
十里美又十六里定軍山接長樂境蒜嶺之外有破

竈村有余坑山有旗山雙嶼有峰頭寨及江陰壁頭
漁溪之外有九龍山玻璃嶺之外有遛上里皆邑西
南附海界外地也自邑南門渡江至錦屏山南行二
十里祀店十里牛田場二十里三山路岐分為五一
西行十五里至薛店一西南行三十里至牛頭寨一
東南詰屈行六十里至萬安所一東行稍南二十里
至白鶴寨一正東行二十里澤郎司皆邑東南界外
地也自海口橋循江而東一里至鎮東衛自里美折
而東行過麒麟山四十里至松下為邑東界外地凡
各路岐分之間皆有支海內入故遷移獨多

蒜嶺以山形如蒜而得名在光賢里上設驛有照海亭登之東望大海無際又有漆林書院唐翁承贊兄弟讀書於此故山曰草堂里曰光賢皆以是故也嶺有古碑鐫石馬泉三字草堂山有小瀑布壇高數十丈承贊乾寧間進士也嘗以右拾遺奉詔冊王審知為瑯琊王假金紫以行梁開平中又為閩王冊禮使黃滔贈以詩有衣錦還鄉翻是客迴車謁帝却為歸之句承贊遂留相審知卒葬於崇安子孫代有顯者余坑山在光賢里之唐嶼下有昭靈廟相傳漢有趙昇者事張道陵得仙隱居鳴鶴山下常乘鐵船抵浮山

山又跨巨鹿憇磐石上今舟痕鹿跡尚存鹿跡長尺
有二寸每六月村民聚祠炎暑酒善敗俗嘗罷釀獨
此地有北風旬日號釀酒風又有盧焦石高數丈海
濤激激龕岩之狀或採為池亭玩必致譴怪

江陰山在蒜嶺之東三江之北興化之北面關鑰也
東為壁頭巡司北為牛頭巡司南為崎頭東北一嶼
浮海曰野馬山可寄北風船五六隻東為大麥洋入
莆門戶也其地又名雙嶼以二山突起海中故名中
有古井甘冽可以濟旱蔡道人岩及百年洞又呼仙
嶼

白嶼又名陳山絕頂曰鴻休岩岩竇天成下瞰滄海
浩無涯涘以僧鴻休居此故名其西又有烏窠岩烏
窠禪師居之即杭州守白居易所參請者也

蘇溪出莆田而通橫山潭入海

漁溪上有昭應廟祀虞雄閩牙將也戰歿於此逕江
有二一出故興化縣金支大潭合漁溪為逕港一出
黃蘗山北過鐵場邊與逕港合流水之南有逕上鎮
今置戍其水過棉亭東抵烏嶼門又南至雙嶼岐而
為二東出白嶼西出後嶼合於昭應廟前會迎仙港
入海

蒼霞山在新豐里

牛田鎮民居甚稠其東有聞讀山為唐水部陳燦讀書處上有遏雲碣潛公室講經臺獅子跡其西有福廬山在時和里明相葉向高所闢也由三天門入至石芝亭為相國書堂石芝者平地拔起高可二丈餘莖細而首折為華蕊之形有躡雲徑石磴四五折入岩腹天光斜影凡二百餘級穿一竇以出有古榕樹輪囷秀潤旁有臺曰榕臺立岡頂俯眺海曲浦淑歷歷如指掌稍降有两石夾峙中露天光類武夷一線天人行峽中得旁穿以出乃入異香洞可容百人洞

初開時異香經時不散因以名遵峽而行為飲虹澗
泉自竇中出如鳴珂珮又穿穹巖而上入雲關有古
仙鷹磔二岩天門外有石闕俗呼擎天柱自上俯視
始見其直如引繩凡四十五尺自福廬西行二里許
曰靈岩有寺在嵌岩中大石迫岩傍作峽兩松樹生
峽半根為石所齧頂作羽葆以自蔽岩之左有靈湫
墜澗湫所來處數石礪相連逶迤巉刻皆泉溜所撞
擊而成者也寺之前後亦皆松林意即所謂松潭也
牛田場有鹽課司地在澤朗之北鎮東之南福清之
藩蔽也其東有東營山新圖作東壁山在海中嘉靖辛酉壬

戎倭艘盤踞於此聯營二十餘里將攻福清戚少保以火器破之始遁去

澤朗巡檢司在化北里有嘉福寺隋時掠琉球五千戶居此萬安所城在平南里臨大海明初江夏侯建設旗軍千四百九十九名北望海壇南望南日內扞鎮東東洋要衝也城內有萬壽塔可以遠眺澳內可泊南風船數十北有大邱寨又北為東金山高峻可以遠望居民以海為業蹈險如鶩頗難防禁折而西曰蓮盤北曰沙塢皆商船必徑之地並可泊船其外有草嶼塘嶼及南匿嶼之屬南匿產鹽差淡塘嶼一

名大姨山其地多風不宜樹日未出東向極目有黛色一點微露水面為小琉球國每風暴漁舟輒為所漂一晝夜至其國水深碧東流不返莎蔓錯織不容轉柁漂者必至而後已其國人得之以藤貫踵課之耕作蓋其國剝木為孟乃能周旋莎蔓間非內地之舟可涉也相傳大姨山夜不舉火懼彼國人望見而至也

東甲山在萬安之東三島相連大小斷續上有大王宮澳內可泊北風船數十萬安居民多採捕於此臨萬壽塔望之隱隱可見賊自海東來多窟於此明時

防剿嘗以二鼓發舟鷄鳴而至蓋慮賊望見吾舟而逸去必乘夜掩襲之也乃萬安港口有一沉水礁而草嶼貓尾以至東甲澳口往往有惡礁非久習海道者不能辨以故巡剿之舟不敢輕出惟嚴沿海之保甲以絕勾引勤哨邏以防窺軼斯為勝籌耳

海口橋一名渤澥橋去縣二十里在海口江上跨方民仁壽二里宋里人林遷募建有海口鎮屬方民里明嘉靖三十四年倭寇至民多死御史吉澄請發帑金七千七百兩賑之民請以是築城其後島夷屢犯以有城可守得全即今寨城是也其江出於故興化

縣界流為百丈溪至金應鋪為無患溪東流二十里
合石塍溪至水陸寺合東溪經縣之阿頭瀆為琵琶
洋十餘里入海又有龍江源於龍首山初名螺江閩書
作螺宋林栗改今名至海口橋而合於江橋畔有林
文江夫人廟規制不甚大而靈異素著舶商入海必禱之
鎮城東北有龍山一名瑞峰寺在山巔浮屠七層可
觀日出西麓有紅蓮閣疎野堂里人章氏所建下有
枚柜潭南麓有草堂宋林光朝故居也自海口西行
三里有網山宋林亦之讀書處學者號為網山先生
自海口南行二里曰瑞岩高數百仞有天台玉虛香

山諸洞一滴泉鑑池紫霄亭休休廬諸勝絕頂石泉
大如箕應潮汐號通海井龍江上有龍江書院中祀
孔子旁為三賢堂祀宋林光朝林亦之陳藻
鎮東衛城明初周江夏所築設旗軍八千六百八十
七名以其在海口鎮之東故名有倉局教場規制畧
備明世閩有總兵春秋二汛駐於城之東門又設土
浙兵二營以守之衛東南有朱文公祠西南有鎮山
菴又有都督戚繼光祠嘉靖壬戌倭寇萬餘圍困數
月指揮秦經突圍請救俞劉戚三帥兵至始解報功
之祠所由作也城中人文蔚聚商賈四集號為饒美

外為鹽嶼嶼外水淺非潮滿不可入城之東有烽火
山有警舉燧於此山頂嵌岩其狀如屋凡三十六間
名曰虎屋宋林亦之詩云興來走上烽火山著足不
定秋風寒四邊黃茅滑如雨低頭俯看毛髮豎幾年
欲到紫菜鄉大練小練及東墻如今一時在眼旁白
雲流水天茫茫酒闌更欲弔虎屋無端日色相催促
一奴魁髻一跛足逐我下山如野鹿其傍又有鹿角
山巨石上仙篆數字人莫能識大練小練在東海中
二島相去十里許無風踰月不可度大練有居民數
十家可泊北風船八十餘但苦水淺不宜輕泊小練

之山周十里多喬木無居人五代盧皓林甲避地居此而林氏世以文顯

海壇山在縣東南大海中以山形如壇得名或曰其上
有嵐氣往來又名東嵐山橫狹而從廣周可三日
行控連諸島度可七八百里唐為牧馬地泰清中始
有寺宇宋初置牧監後以駑悍不齊罷皇祐中許漁
民耕墾淳熙中有戶三千元戶滿四萬邑得以陞州
者以海壇諸里佐之也其山曰黃崎曰紫關曰牧上
曰砦頭曰坑頭曰大小鰲網其水有三十六派湖亦
名三十六脚湖峰巒環繞如畫湖水深碧產蓮瀕河

沙輒能没人中有龍窟相傳元庚申歲龍出與馬交
而生駒毛鬣異文以貢於朝日行千里二三年後大
雨電湖忽自決與海相連云近塢有大小塢及錢藏
皆為泊船澳東方最高者曰軍山王氏謫戍多居此
間其旁島曰浚門曰獺步曰廣州堤曰流水隔曰東
墻曰小墻小墻北曰十二藍焦東墻北曰百兵焦大
桑小桑兩桑間曰桑門兩墻間為鸕鷀門是極東之
島舟不可行矣海壇人舊事私記曰海壇山周八百
里分海上海下四五六七圖戶計三千七百口計八
萬四千左有東嵐瑞湖右有顯跡湖

即三十有碧沙
六即湖

洋百花砦鍾門三鎮皆市井殷繁而碧沙洋產人參
鐘門多科第尤為海外名區焉閩海實錄云相傳舊
有一州一縣州曰沙州縣曰郎縣不知何據洪武初
徙其民而墟之置遊兵千二百名然所有苗米八百
石征之合縣如故也正統間邑中布衣林揚詣闕上
其事逮繫詔獄十八年至天順復辟始允其請而釋
之嘉靖季年倭寇據為窟宅剿平後流民漸集蔚然
成井里至隆慶間設海壇遊置戰艦三十兵六百六
十九名啟禎間幾復舊觀矣東為觀音澳泊北風船
二十餘東南一嶼浮海曰牛山常泊船十餘皆賊藪

也東北曰蘇澳泊南北風大船八十餘但不利西風
又虞潮退膠舟而賊至西南為龍王宮可泊北風船
三十餘其旁又有晃尾澳可泊北風船三百餘又有
進屏澳可泊北風船三十餘疑即浚門也蘇澳西南
為石牌洋一石高可百仞在洋中如石牌狀石牌下
有惡礁曰金錢礁龍王宮前亦有金盞銀臺礁出入
慎避之東至東甲南至草嶼西至萬安各一潮水東
岸即林亦之所謂東墻也在海壇東北南望牛山一
小嶼曰小岸即小墻也東為葫蘆澳可泊北風船二
十餘出龜鼉高於人流水甚急倭寇往來之衝其南

曰南江北有鬻殼澳

鐘門嶼在石牌洋之西北可寄北風船三十餘其嶼玲瓏如鐘亦聞古有鐘沒於此潮退猶露其紐島饒淡水汲者聚焉近嶼石高二丈如媪東南瞰其石趾方二十丈中有井泉與潮候應船泊之都會也半潮抵慈澳則長樂界

苦嶼門在鎮東衛東北二十里海中可寄北風船十餘凡南來商船俱在此候風過芟入省或遇風信不利經旬淹泊商旅無不苦之故曰苦嶼南望石牌洋東望鐘門後澳為湧月可泊南北風船二十餘北入

松下西入鎮東有惡礁曰鷄屎礁舟行宜慎之五虎
海壇遊汎至此分界

丙子行七十里至青坡又二十里渡烏龍江水面約四
五里夾岸俱山波濤驚駛又行四十里次福州府將軍
佟公少司空蘇公撫軍金公及藩臬以下皆來迎甲士
五千軍容甚盛旌旗相屬十餘里又有臺灣歸化人及
琉球使臣以次見

元年畫界自定軍山歷高嶺山

小石山石屏至閩安
山石龍山

鎮為長樂邊邊界以外斗入海四十里梅花所二十
五里東山十里海路俱移共豁田地九百一十三頃

有奇八年展界安兵十處

七星岩十名小門二十名

總一兵三百名壺井山十名渡橋山千總一把總一

兵二百五十名雙桂山十名金墩山二十名燕山十

名龜宿今從長樂營撥守七沉名松下把總一兵五十

山十名東山港尾十五名壺井大嶼二十名仙岐六十

三名梅花寨把總一兵四十名浪頭鼻丁石一十五

名候閱定縣設於唐武德間以風物熙和故稱長樂

舊在六平山析新寧之敦素里為治今所謂古縣是

也上元初防禦使董玠以其地卑濕徙治吳航頭即

今所也吳航去縣西半里閩中記吳王夫差畧地至

此作戰艦故名永樂間中官鄭和過此改為太平港

閩書以吳王濞反漢東甌王搖從之故有吳航之名

與此異至以為即馬頭江則大謬矣

六平山新圖作鹿平旁有高嶺成臺山宛轉六曲上有巨石中穿為門通往來壁上勒第一山小有天字宋時於此建九日軒寶慶中太傅陳俞居其下亦名

太傅山

瑞峰院在同榮里五代周廣順二年太保王紹齊以僧居岩間時有雲覆其上因作為院有石屏慶厯間提刑蘇才翁刻字於石屏闔書以為石屏在縣東之芝山亦云蘇邵二公勒字蓋又一石屏也

石龍山界連閩縣以上為初遷近內界

七岩山疏名七里岩在縣南五都之羅田其傍溪湄
山有奇勝境曰寶山雲曰石澗泉曰龍津釣山巔有
湖相傳湖中有巨蚌含珠曰珠湖自此而東有社溪
有大社小社二村巡檢司在焉其南有郎官山連石
尤嶺可通福清

牛壘山中有田一區邱壘環之有壘下民城洪武間
江夏侯建今置戍

壺井山有一井在山麓如壺鹹潮至則沒潮退其水
復淡自壘下城厯江田漳阪東山三戍而至其地凡
四十五里

志勝云在縣東北四十里
誤以圖考之尚在東南

下有壺井村有

水曰壺井江其出海處有二石對峙曰王母礁

新圖作虞

母宋末楊妃負益王福王航海經此

雙桂山疑當作芳桂蓋志有芳桂里也東至海濱有

仙岐城自城以北有大董小董村董峰在焉一曰福

山輿地紀勝云上有神人裸形披髮見者獲福故名

閩中紀云董奉字君異侯官人少得道嘗游交州刺

史杜燮病死已三日奉以三丸藥納之口中食頃更

生奉後居此山為人治病不責謝但令種杏一株久

之有杏七萬株森然成林其西有蛤山旁有嶼二一

曰人赤嶼一曰蛤嶼

雁峰即疏所稱燕山也新圖作雁山下臨嚴湖上有御風臺嚴湖一名西湖陳太建元年邑人嚴光之子恭賈於維揚舟次江許買龜五十頭放之光家居見有黑衣五十人齎錢五千緡至曰子所寄也及恭歸語放龜事乃大異之遂捨宅為寺湖中有小阜曰蟹山有六竒曰牛山曰馬水曰龍灣曰虎潭曰都官渡曰措笏石自是而東並海有聖娘山其下有林婆湖林婆者唐林鷗之妻鷗字神鳳開元中為倉曹參軍嘗築濱澗湖可溉田千頃妻趙氏亦捨奩田為湖遂名林婆湖稍北有魁山以其魁然異於衆也有植柱

廟相傳唐時有神憑巨木溯流而上漁者徒之下流輒復上如是者三土人以為異而祠之久之刻木為像遂以名其廟又北為碁山有石臺仙人奕處也碁局尚存

梅花所在二十四都去縣四十里周江夏築城設旗軍千四百五十八名其地曰梅花山下有梅江俗諺有梅江水直千金之句人烟繡錯民習販海往往關出外境明王恭梅江詩云君不見梅江浩蕩連滄溟積水不極涵空青未明先帶扶桑日入夜倒浸銀河星澄波萬頃秋無盡漠漠遙光海天迥島嶼千家烟

火深軍城百雉妖氛寢漁笛吹殘夜落梅空江長見
舊潮迴珠潭露下漁風起蛟室雲歸蚌月來仙源香
霧浮花島海色空濛望中好元圃滄洲路不通清水
黃塵夢難到

石澳去梅花所二十里長樂北境盡處也下有

石江江上有石相傳地產紫菜味極珍美閩王審知
採以入貢禁民私取因立石焉澳民業漁宋末陸秀
夫奉二王從此入閩安鎮二澳俱泊南風船而梅花
孤懸海外飛沙將掩雉堞風颺時作羅舟不能久泊
誠要衝也

磁澳山在焦山石梁巡檢司之外亦作慈澳新圖作
滋澳內直壺井大嶼北望苦嶼門原設防船十二隻
以備東沙白犬外洋之盜萬厯之季併入五虎遊海
船南來轉葵者常候風苦嶼門或已行而潮汐不利
則泊滋澳避戍既撤每虞寇掠向來建議欲用漁船
設長戍南風則駐苦嶼北風則守磁澳亦扼要之籌
也
東洛西洛二島相連在磁澳苦嶼之間南一小嶼曰
橫蒜東即烏猪洋也洛門可寄北風船十餘但礁多
宜慎西南一山秀聳如牛角曰牛角山可寄南風船

二十餘牛角南十餘里即松下

東沙白犬二山相連在磁嶼正東北望竿塘南望東
岸東沙澳水深九托可泊南風船百餘用罩已針三
更可至牛山白犬以形似蹲犬得名繞島石稜如鋒
旋索遇之輒斷泊時倘遇颶風即有不測之危惟犬
目一處可寄北風船二十餘向來雖諫小埕後哨然
巡船不時至盜自東湧徒巢或自外洋突犯輒於此
分艖行剽巡剿之舟由竿塘用正南風由大馬頭蘇
澳用西南風由磁澳用西北風然磁澳水淺潮退未
半而舟已膠往往望見賊船而不能逐也

南茭在梅花所前一沙線下挿入海中上溯閩江而西長數里皆鐵板沙大舟遇之皆膠更遇風浪鼓拍動至震裂有一港可蜿蜒以入閩江非老於海者不能識且其中沙面時有遷徙必滿潮至八九分乃敢入也二茭夾列閩江之口南茭以沙險北茭以石險南北商船過此嘗惴惴焉其閩江之舟東出者利西北微風

長樂連江二邑夾閩江之尾為境而閩安鎮居其中縮穀海口則閩縣地也自石龍山厯象洋山至馬門嶺為閩縣邊邊界以外十五里東岐高樓十里象洋

俱移共豁田地三百八十九頃有奇八年展界安兵

七處

石龍山五名武定山十名武定門二十名登高山十名象洋五十名長柄山十名東嶺山二

十名今從閩安陸營撥守三汛

象洋千總一兵七十名下塘寨把總一兵一百

八十名石龍寨把總一兵一百名候開定

閩安鎮海門也有城東南際大海閩江自西而東更

其前由省城往從陸路則出水部門六十里而至從

水路則自南臺九十里而至有柔遠驛琉球貢船常

泊此有稅課局粵浙商艘往來不絕有巡檢司千墩

者所駐也人烟稠雜百貨所湊城四周皆水出城南

門望隔江有石龍山山下有大石出江中其形盤屈

號金剛腿北門外有橋曰沈公橋橋外為教場城之西為水寨東臨江汜汜之隔浦登高山也其江為全閩之幹水隨地而異其名源出浙之龍泉建之浦城崇安又合延建汀邵及古田閩清永福大小諸溪之水至此入海大抵閩江承建劍上流谷陋川激至馬瀆山漸廣而緩曰馬瀆江至長樂侯官之境螺女金瑣石崑諸江來合之曰洪塘江又東曰馬頭江以江中有石如馬頭故以名眾流所匯浩瀚無涯有洲如桃號棹桃洲予所渡烏龍江即此也又東至會城上洞江自左下洞江自右來會之故會城三面距水而

其滙處曰南臺江越王釣龍處也上有萬壽橋平海
頭陀王法助所募建長百七十大水門二十有八又
東東西兩峽江來會之二江所受之水至多故又因
其名而稱西峽江而統謂之閩江也閩江過閩安鎮
有小山當其中流曰急水門又東有兩石礁曰雙龜
又東合於大洋有五峰列峙即五虎門也江之南岸
自石龍山而東曰武定門又東曰浮嶼又東曰猴嶼
其地有七嶼曰洋嶼般嶼獺嶼竹嶼鹽嶼芝嶼與猴
嶼而七也又東曰瑯琦曰浮江江之北岸自登高寨
又東曰碁盤寨曰象洋寨其地有怡山院雲峰嶺又

東曰長柄山又東曰下塘寨又東至館頭與連江接境矣五虎門之旁又有官母嶼築城設巡檢司澳內可泊南風船百餘向設船十八艘外控竿塘定海內杆館頭伏莽時發哨邏殊不易也迤西為荻蘆門屬連江

已卯自福州發行三十里至北嶺又二十里至何虎嶺又二十里至潘渡又十里至羅崙渡河又二十里至連江縣

元年畫界自馬門嶺山厯浦口麻嶺至碁盤山為連江邊邊界以外斗入海九十里北至六十里奇連澳

三十里定海所附海二十里馬鼻十五里大澳五里

館頭俱移共豁田地二百三十四頃有奇於浦口因

界設守八年展界安兵二十一處

名大澳山十名大澳嶺四十名東岱嶺十名長沙

名東岱臺十名小澳十名浦口千總一兵一百名松

場二十名腰嶺十名麻嶺十名白鶴二十名麻坂把

總一兵八十名網邊十名驢頭十名拱頭十總一兵

二百名馬鼻二十名嶺口十今從連江營撥守六汛

名浮曦山十名東山三十名今從連江營撥守六汛

東岱小澳把總一兵一百名浦口六十名定海千總

一兵一百三十名苔菜把總一兵七十五名拱頭寨

把總一兵五十名候閱定

連江本溫麻縣地沈約宋書晉武帝太康四年以溫

麻船屯置溫麻縣是也武德初析閩縣地別置連江

縣連江出羅源縣之王土溪黃柏潭會舊懷安縣之
桃洲密溪三派合流至縣西曰羅崙河繞縣治南亘
欽平上下二里東流入海其在縣南者名鰲江去郭
門百步跨江為橋長五十丈水門十有六作於宋政
和間俗呼江南橋自此東流二十里有東岱山亦稱
岱江有漁滄潭石刻漁滄天乙之門東岱寨置於此
江之北岸即浦口寨也更東則海口矣
邑形東西綿亘海在其東閩安鎮在西南閩江之口
經其南境亦大海也其東北境又有支海內入故邑
東偏之地如古吐海中北茭定海為舌之端小埕黃

崎為舌之腰而浦口為鼻舌之本也初遷於此立界自是以東遠者百里並在界外予行自潘渡入邑境羅崙河即英顯蕭公顯靈處也公名孔冲五代時建安人中唐莊宗甲科隱於邑南之克峰薙髮為僧志行堅苦能伏虎豹歿而邑人祠之宋靖康初建寇葉儂犯境遙望羅崙有牙旗火光又聞鼓角呼噪之聲遂巡退去避寇者咸見神兵歸廟中紹興中海寇掠荻蘆亦見九龍江上有巨艦揚旌而下上書蕭字因得賜廟額曰英顯

自城而南七里曰館頭其地有覆釜山形似釜而勢

下垂南峰之麓有石雙峙道出其中曰石門唐中和
中建石門寺於此有玉華洞以巨石相倚而成其中
深邃燦若玉華有玉人峰半月池皆取形似有清陰
洞在石門寺之北其下平廣可坐數十人上有佳木
蔭翳故名又有石鼓石魚五臺關牛諸石石鼓形圓
扣之有聲五臺者巨石五高而頂平如臺之峙石魚
關牛亦各以形似名也
自館頭而東五里至馬門嶺又五里定安又五里長
沙又三里大澳又三里州嶺又十里小澳邑之南境
八年展界也小澳斗入海為東南極處自此折而西

北十里百勝寨又十里仍至東岱海口矣

荻蘆港與閩江相連在長沙定安之外去縣三十里

志勝云在縣東四十里誤

一名九龍江上有荻蘆山亦名九龍山

七島外列因以成港海面約半里七島者泥塢塘下

定岐蓬岐後沙下邊東岸也相傳秦始皇遍鑿東南

諸山之有王氣者此山根連鼓山鑿之使殊得蘆根

一莖長可數丈斷之明日復合役者苦之夜夢有神

告曰夜可置鐵錘勿收如其言蘆莖遂絕其絕處有

血痕因名其地曰荻蘆峽今亦謂之荻蘆門

自浦口而東十里至松塢又十里中麻又十里蛤沙

又十里東坪又十里小埕寨又五里定海所而地盡矣折回西行十里至官塢又折回東行十五里安海十五里黃崎十五里苔菜又五里北茭為東境盡處蛤沙有城洪武間周江夏建有河泊所有石壁高數十丈上刻字曰劉禹錫過此

小埕寨水寨也設欽總一員白犬羊塘東湧及東西二洛其汎地也南與南日寨會哨於南茭北劄西洋山與烽火寨會哨澳內可泊北風船三百餘定海所在二十七都因山為城三面阻海故設操屯軍千五百二十名南門距海五步風起潮湧可激女

墻為省會鎖鑰連江扞蔽城之坐山曰雁塔墉登之以望上而北茭下而南茭內而五虎荻蘆外而竿塘白犬皆在指掌城為周江夏所築火器樓櫓甚備嘉靖末倭寇攻圍固守不陷萬厯末移水師遊擊二十五艦駐防屹然雄鎮矣南門一澳泊北風船二百餘西門外長澳泊北風船三百餘山東北為鐵沙澳雁塔山後為小埕後澳泊南風船百餘城東南五里許海洋中四嶼珠聯伏礁甚惡戚少保嘗統四十艘犯夜而出皆劇碎南門西門二澳遇夏至後南風盛發舟不可泊秋冬颶風漁艇商船紛紜蜩集奸良莫辨

稽詰殊難也

北茭巡檢司有城周江夏所築舊為荻蘆巡檢司明
初始易今名一山直趨海中石骨嶙峋為省會鎖鑰
南北之天塹也城下可泊北風船數十北上商船非
東南風不得過或少參以北風舟輒絙礁而止遊氛
自東湧西洋乘之有坐困而已故商船將至茭而風
未便者又須於黃崎候風

黃崎澳在北茭之西其外即銅鼓洋有土堡居民百
餘家澳內可怕北風船五十餘斜行至定海三十里
至竿塘一潮水竿塘兩山相連在海中以多茅竿故

名先有居民洪武間內徙上竿塘峰巒層曲周三十餘里有竹扈湖尾等七澳鏡澳泊南北風船十餘竹扈澳泊南風船三十餘長箕澳泊北風船三十餘下竿塘周二十餘里有白沙鏡港等七澳馬鞍澳泊北風船四十餘但苦泥滑下梳易移二島南至南茭北至北茭西至定海東南至白犬西南至五虎各一潮水相近一石峰高可六十餘仞俗呼竿塘杙凡哨探淡水鷄籠琉球日本俱從此放洋認此收澳倭寇至竿塘亦必泊而取水焉

奇達澳在北茭之西斜徑至安海十里

下木澳

舊海重編作下目澳
又有上目澳在南

與黃崎對峙在北茭之

東可泊南北風船二十餘北至西洋南至竿塘各一

潮水

大小亭山桑嶼閩嶺俱在海中舊屬崇德里昔黃氏兄弟載寶歿於亭山因祠於此按即黃助與其弟光也

馬鼻山插入海濱以形似名南行為玉樓山有嶺曰透嶺有嶼曰鶴嶼皆設戍處元年遷界也自馬鼻而西為碁盤浮曦亦設戍處乃八年所展界其地香爐山有章仙壇仙開元中人嘗斬蛟延津江中有勅書

碑記其事又有磨劍石掃壇竹及石碁盤此碁盤山所以名也

庚辰行四十里至丹陽鋪又四十里止羅源縣

元年畫界自碁盤山歷岐陽鋪護國鋪馬坑至白鶴

嶺為羅源邊邊界以外斗入海六十里濂澳門五十

里粧畧附海三十里大獲二十里蹟頭十里松山皆

移共豁田地二百六十六頃有奇八年展界安兵十

一處大獲山十名小獲山十名松山三十名邊崎山

二十名王沙十名疊石今從羅源營撥守七汛總一江把

三十名半天十名今從羅源營撥守七汛總一江把

一百名五里渡把總一兵一百名濂澳兵一百名邊

粵國山見已各表

四

候閱定

唐大中五年割連江一都置羅源場三山志云羅源溪名亦姓也一名羅川咸通中復割懷安地益之陞為永貞鎮後唐長興四年閩王陞為縣宋乾興中始名羅源縣初治水陸寺側介兩溪間時有水患慶厯八年遷於戴坑即今治所嘉靖中始築城周三里羅川源出蔣山接金鐘潭流至四明溪分為三派曰中溪南溪後張溪流入松崎以達於海濂澳在縣東邑之左臂也而連江之奇達澳為邑右臂濂澳之東為鑑江又有東衝皆寇來必由之地嘉

靖未濂澳奇達皆嘗陷於倭自濂澳至西洋一潮水
澳中有山曰簾山以形如簾幙圍繞民居故以名濂
澳有十景曰石筍曰仙人跡曰感夢泉曰山羊鼻曰
石虎曰文筆峰曰通濟橋曰馬鞍山曰雙石與簾山
而十也

黃沙溪

疏誤作王沙

源出寶勝山流入松崎港

疊石公館在羅平里亦名飛來石山頂一峰突出有
巨石平如砥小石疊其上故名

平已行三十里至疊石又三十里至白鶴嶺止
靈德縣
福靈州領縣二曰靈德曰福安與州治俱傳海元年畫

界自白鶴嶺歷靈德縣銅鏡河溪溝至小留嶺為

靈德邊境界以外斗入海八十里象溪七十里梅溪

六十里飛鸞附海三十里金嵯河二十里黃坑十里

三嶼皆移共豁田地一百六十頃有奇於闔坑嶺因

界設守八年展界安兵十四處界首嶺十名白鶴嶺

兵三十名蚶崎山二十名黃土巖十名南山二十名

馬鞍山十名張灣十名總兵一百二十名林長嶼十名

名金嵯河西臺二十名金嵯河東臺二十名今從福

寧右營撥守九汛飛鸞蚶崎把總一兵四十五名洋尾

土岸十名港尾十名藍田十名金嵯山西臺五十五名黃
名金嵯東臺把總一兵五十五名馬鞍山二十名候閱
定

縣先為唐時感德場偽閩龍啟元年陞為寧德縣東
面距海支海內入抵於邑之東門一溪繞城之南曰
南門溪一溪繞城之北曰藍田溪皆滙於城東浮其
中者曰酒嶼曰金甌山曰金崎曰錢岩曰檄欖嶼曰
青山其洋曰三江洋大島當其口三都地也蓋邑之
環拱多在東故他縣治皆南向而寧海獨向東以白
鶴為玉山碧山為近案碧山外大海為明堂規模特
宏敞焉其在支海之南岸為三都地山為飛鸞蚶崎
梅溪之屬在支海之北岸為四都地藍田章灣黃坑
馬鞍山皆在焉少北為金鰲橋海口即斗門也又北

為東墻海口距縣二十五里即金溪銅鏡之水出於
三嶼者也又北為金垂海口距縣三十五里金垂河
上接渺外溪又上穹隆溪邑西南境之水皆匯於此
矣由邑南門黃土岸陸行過銅境渡金垂河歷溪瀆
至閩坑接福安境則為初遷內地之界白鶴山在邑
之西門一都地也南連白鶴嶺予行自此取道焉
白鶴山俗呼西山秀拔千仞南接飛鸞北接蓮花峰
懸岩峭壁空洞幽深泉水清冽是為龍湫其石為靈
谿書院又有泉曰定泉旱澇不增減白鶴嶺百折盤
空海上諸山皆入延眺嶺之南飛泉百丈遙空如銀

河倒瀉曰南山滌嶺半有黯井味極甘美宋樞密曹
輔所鑿也輔時為縣尉偶越此嶺暘甚心自念曰安
得引一泉以惠行者乎方舉念而泉忽湧因鑿為井
初名應泉又名曹公泉

飛鸞嶺在邑東二十里下有飛鸞溪源出羅源界其
東峰有百丈滌名棲雲潭唐黃岳家於嶺下岳博通
典籍尤精易數黃巢寇閩避地者聞岳好施歸之如
市悉賴全活乾寧中王審知累徵不應必欲致之岳
投棲雲潭鄉人哀之因祠於梅溪

梅溪山與飛鸞相屬南俯大海前峰四拱勢如勒馬

號曰勒馬山縣學取為前案嶺下有萬石岩石岩如
屋可容數百人中
有石竈石井石床石几傍有石舟
兩崖之間有石橋橫跨又有仙茅山舊傳茅君兄弟
煉丹於此有土堆中虛擊之磴磴有聲號曰神仙土
鼓山頂產石辣菜其味芬烈異常又有城澳山環匝
如城中有三澳可置萬家又有五馬峰縣南諸山奔
會至海垂盡而五峰突起狀如立馬邑之捍門也
金甌山若甌浮海面與酒澳猿毛嶼及大小金崎諸
山聯絡海中而此山特近

瑞峰山在三都海中距邑三十里秀拔萬仞昔有韓

董二仙修煉於此丹井碁盤尚存又有黃灣峰嵩山
皆與並高而嵩山之崖有瀑布千尺如白練懸空青
山海島周七十里有田土無官兵居民

章灣在五都或作漳灣新圖作張灣誤其旁有仙人
巖雙掌痕深數寸又有仙跡巖亦留雙掌及馬蹄跡
相對之山復留仙人坐痕又有阮先生祠祠宋紹興
間上舍阮大成又有龍江井溢則稔枯則旱邑民以
為占驗宋乾道元年邑大旱官民祈禱不應章灣士
人阮元齡撰懇旱魃文齋禱龍井大雨立至三日乃
已是夕元齡夢黃衣使者言奉上帝命取懇魃文且

令倣裝以須元齡晨起齋沐錄其文而熟之踰日果

卒文多奇字畧曰吁咄哉酷魁肆虐多厯時所恒暘

烈煇燥灼煦譬堪輿大於一高俎窮極萬有羅致

采弄音舉百億魁屬悉持巨炬熨笈燥毛箇簾皴皴

箇末五切簾木古風伯唾怒唾音泰怒音勸厥貪汚

切曠音胥火烈也助也勸音盧動區墮堞音課出入胥弔音舉熖雲疾雷震赫

時暑九泉焦而揚塵頻狩燎而成旅音舉流泉石之淵

淵窘蛟龍而就敗音汝魚民森而顛森音覽物妥而

晡安音俵後云帝哀下民寧不震怒諒勅六丁撮汝

驍鼠凡數百言倍屈類是見閩書中

三嶼在六都少南為林長嶼海口金溪水出焉海中
又有官護嶼為嶼蓋所以為三嶼也或云海中有三
小墩即三嶼故以名過海口又南為騶山山形秀聳
有騶駟奔馳入海之勢故名官護嶼志作官扈山地
勢坦舒土壤饒沃山尾洋底有井源出浙江龍泉縣
界東流至斜灘過載首合松潭溪至廉首村會此名
曰官井洋出此則渺茫大海矣志有扈崎山疑即烏
嶼官井洋內曰雲淡門寧德之左臂也金溪源出古
田縣入油溪逕羅源會百丈滌竹林潭至溪口村同
出三嶼會於海

金垂河疏作金埕河誤其海口曰浦門當其前者福
寧之白瓠山也外渺溪入焉溪自政和界遷清岩甘
露溪至銅鏡金垂滙於海宋陳嘉言霍童山詩云藤
上老猿欲墜松間野鹿相隨苔蘚綠埋丹竈桃花紅
出金埕霍童山杜光庭以為第一洞天有大童小童
峰又有石橋亘空石廊三十餘丈海鮓井下與海通
古仙人霍童所居也在金埕河南渡距縣可二
十里志作縣北七十里誤銅鏡
舖有水南湖瀦水不竭可資灌溉有博濟泉夏列冬
溫自此渡金垂而北為溪瀉又北為閩坑自此折而
東則福安界矣閩坑之北有周墩堡故於此設縣署

曰東洋行縣有東洋麻嶺巡檢司後移雲淡門

西洋山周四十里內澳可泊北風船百餘旁一澳名
景初可泊北風船十餘向不設兵賊所嘗泊也上控
盈山馬砌下引北茭外望東湧內通竒遠東衝濂澳
鑑江飛鸞鹽田白馬雲溪諸處為羅源寧德二縣外
藩自大金以往東北西北風皆利順風至竿塘定海
各一潮水

橫山在西洋山東突兀海中不可泊船東湧內犯賊
船必由此至西洋一潮水自東湧來三更可到

東湧在東大海中兩山東西對峙中一門相去里許

四面峭壁澳內水深五十餘托東山有大王宮澳前
多拳石泊北風船五十餘西山一澳泊北風船百餘
後一澳泊南風船二十餘絕島孤懸風信難測哨邏
不能時至往時議設長戍慮險遠難於策應輒復中
止但為賊艦所窟穴賊所用釣艚高艦習於風濤轉
旋便利剿之者必以夜晝日望見我帆檣即行走外
洋我兵逐之直搏影捕虛耳每遇西北風自三沙往
五更可到自大金往四更可到西南風自西洋往四
更可到自竿塘往五更可到

壬午行三十里至三嶼渡十里至金垂渡
沿海路又三

十里踰大梨嶺又五里至白石司渡江又二里次灣塢
福安縣地也

元年畫界自小留嶺歷廉嶺

嶺縣前洋尾河茶洋嶺大梅柳溪至杯溪

村為福安邊邊界以外斗入海六十里衡洋五十里

白石司附海三十里三江口圯灣皆移共豁田地四

百八十四頃有奇於大梅因界設守八年展界安兵

十一處

衡洋山二十名大梨嶺十名白石司十總一兵二百一十名白石司馬頭十名灣塢十名

梅洋山把總一兵一百名下裴山十名灶嶼十名

前郎山十名官嶺十名鹽田把總一兵一百名今

從福盛石營撥守八汛白石嶺二十名南浦三十名大梨

三十名灣塢把總一兵五十名馬頭梅洋候閱定

邑為唐長溪縣地宋寶慶間分而建縣於韓陽坂即
 今治也邑水之大者有三並會於城南之三十一都
 曰三港口亦曰三溪口疏作三江誤其地有洋尾寨以海
 潮所止也其水之自西而來者出政和之牛嶺曰穆
 溪過廉嶺曰廉溪自北而來出壽寧曰平溪以其遠
 郭之西而南流亦曰西溪自東而來者出浙之慶元
 曰長溪將近邑而秦川大梅化蛟諸溪次第會之合
 而西流以其在郭之東也又謂之東溪三溪既匯合
 流而南曰蘇洋又南曰六印江曰甘棠港曰芭蕉洋
 更出古鎮門則大海矣然猶為內海有重沙二支自

福寧州南出海中又逆插而西蜿蜒遙拱於邑之南
內曰長興外曰大金須自邑之西南泛海過箬頭幫
乃為大洋也

初遷內界自寧德縣至閩坑皆自南而北過閩坑則
折而西又過小留而至廉嶺廉嶺一名靈巖巖下有
金印石釣魚臺前有雙劍水廉嶺之名始於唐人薛
令之有靈谷草堂令之所居也令之嘗聞龍吟之聲
復登神龍二年進士開元中累遷左補闕兼太子侍
讀時李林甫不愜於太子故宮寮亦見簡畧令之題
壁以寓諷曰朝旭上團團照見先生盤盤中何所有

首宿長闌干明皇見而續之曰啄木嘴距長鳳凰羽
毛短若嫌松桂寒任逆桑榆煖令之遂自病免罷歸
上聞其貧命有司資其歲賦令之量口受賜肅宗即
位以舊德召而令之已逝詔官其後人且表所居村
為廉村水為廉溪山為廉嶺以旌之所著有明月先
生集其弟之子芳杜有行誼卒而鄉人祠之宋政和
中山賊湯軫率眾至引弓射祠旁木忽怖伏請命若有
物禁之者遂就縛建炎中賊葉儂經此擊祠中鼓不
鳴走之溪忽水暴漲不得涉為邑人所殲嘉定間賜
號靈佑侯杜四世孫念其亦為神附祀於祠邑阮氏

盜侵令之墓傍地家輒火見念其指麾於烟中紹定間賜號顯應侯其旁有城山唐末黃巢之亂邑民於此築城保聚故名

六印江以江中有六小嶼故名上有雙岩先是文殊寺有大鐘唐末黃巢寇閩過此欲取以烹牛鐘忽飛入龍潭後潭漸塞復飛入六印江風雨中時時出沒鏗然有聲宋咸平三年鐘浮眾舉之不動雙岩寺僧以錫杖挑之鐘自起因留寺中

甘棠港舊名黃崎港在六印江下先有巨石屹立波間舟觸之輒覆溺唐末王審知為威武軍節度使欲

鑿之難其後乾寧五年夢有神自稱吳安王許為助力因命判官劉山甫詣邑祠之祭未畢而風雷暴作見有一物非魚非龍鱗黃鬣赤三日夜而風雷息已別開一港甚利舟楫事聞優詔嘉獎以為審知德政所致賜名甘棠港封其神為顯靈侯梁侍郎于兢作忠懿王碑嘗紀其事其上有甘棠公館外即古鎮門一名白馬門

白石巡檢司在邑南一百二十里設有城堡故為黃崎分司唐榷務也明時徙於長崎而設巡檢司於此監司行部嘗駐節焉後有泉石峭壁甚奇泰昌元年

岳令張蔚然刊木闢磴求得勝地置亭其上名之曰
青林洞青林者令別號也令錢塘人錢塘嘗有青林
洞云

大萊嶺盜窟也明時置戍今訛為大梨閩音之訛也
下梨山新圖作下邳以圮灣而得名也

癸未行四十里官嶺渡河又四十里止福寧州

甲申殷主政分閱桐山予與石學士金中丞先行返省

元年畫界自杯溪村歷福寧州城

赤岸橋楊
家溪店頭

至與浙

江分界之沙埕止為福寧州邊邊界以外斗入海八
十里沙埕七十里水澳四十里三沙三十里圮灣鹽

田附海十里松山皆移共豁田地一千七百九十七

頃有奇八年展界安兵六十三處

名嶺梅嶺十名小馬嶺把總一兵六十名尤家大山十

名嶺斤嶺十名漁洋嶺十名沙塘把總一兵一百名

冲嶺五名大沙五名州前嶺五名白塔山五名魚片

山十名瓜嶺十名呂徑山十名青浩十名青浩寨把

總一兵一百名小灣嶺十名小澳山十名周灣山十

名岐溪二十名西洋千總一兵二百名橫坑二十名

數嶺五名教嶺五名范溪五名圪崖山五名六都嶺

五名五都半嶺五名三佛塔五名三佛嶺五名黃宰

山五名七溪團五名村保嶺五名村保臺二十名斂

城守備一把總一兵三百名倉頭山二十名羣頭山

十名斗門山十名三墩十名缸窰嶺十名團山十名

斂城後山十名嶺下十名周倉嶺十名後崎二十名

白琳把總一兵八十名店頭河十名王孫十名鄭崎

十名岩前十名名塘底把總一兵八十名王孫十名鄭崎

名後灣十名桐山十名南洋山十名兵二百名東山十名

山十名西山十名南洋山十名駱駝山十名戰坪洋

二十名	關二	五名	羅浮	名小	名小	十名	名小	把總	激城	南鎮	名白	二十
名分	十名	沙塘	延亭	馬寨	松山	名松	名小	一兵	千總	把總	鷺三	名沙
水今	名從	七名	十名	六名	十名	赤岸	名赤	十名	一兵	一兵	十五	名分
福	名	名	名	名	名	名	名	名	名	名	名	名
寧	名	名	名	名	名	名	名	名	名	名	名	名
營	名	名	名	名	名	名	名	名	名	名	名	名
撥	名	名	名	名	名	名	名	名	名	名	名	名
守	名	名	名	名	名	名	名	名	名	名	名	名
十	名	名	名	名	名	名	名	名	名	名	名	名
七	名	名	名	名	名	名	名	名	名	名	名	名
汎	名	名	名	名	名	名	名	名	名	名	名	名
大	名	名	名	名	名	名	名	名	名	名	名	名
金	名	名	名	名	名	名	名	名	名	名	名	名
千	名	名	名	名	名	名	名	名	名	名	名	名
總	名	名	名	名	名	名	名	名	名	名	名	名
一	名	名	名	名	名	名	名	名	名	名	名	名
兵	名	名	名	名	名	名	名	名	名	名	名	名

閱定

按連江縣志晉太康三年析侯官縣溫麻船屯置溫麻縣其治所在今州南三十里有古縣村蓋盡州境以至羅源連江皆溫麻矣隋開皇九年廢溫麻入豐

皇朝通志

卷之

縣豐縣者今之閩縣也唐武德六年以溫麻廢縣置長溪縣在龍首岡即今州治也既而都督王義童自龍首移治於連江之北改名連江縣今屬福州而長溪縣治為寧遠鎮嗣聖十九年復置長溪縣而連江縣如故元至元二十三年始陞長溪縣為福寧州領福安寧德二縣明為直隸州

按州境東西綿亘自州西至於柳溪五十里接福安縣界自州東一百八十里至桐山接溫州界其在西境者曰楊梅杯溪下塲溪官嶺皆邊內海自城南州前嶺三十里至沙塘又南為漁洋埤山脈自此分為

二支挿入海中一自漁洋而西歷小馬南屏以至於長興凡一百二十里一自漁洋而南歷武曲八十里至大金所折而西歷閭夾羅浮至於箬頭幫又一百五十里長興之北海水盪而東入至於八寶又東至鹽田上接杯溪諸水在州城西南三十里長興之南海水盪而東入至漁洋埠其海曰連江其里為連海里蓋漁洋左右皆海地形至狹一埂過脈如蜂腰也自城東門折而南行十里曰松山烽火寨在焉繞其外者曰松山港過松山港而南行曰赤岸又南曰後崎而抵於海由赤岸而東歷青浩稍南至三沙漸斗

入海中歷五澳至黎智墩而止州東之第一支沙也
遶其外者曰楊家溪過楊家溪歷錢大王舖折而南
又斗入海過三佛塔牙城梅花墩至南金墩而止州
東之第二支沙也遶其外者曰湫溪上接藍溪過藍溪
歷屯頭太姥山湫城秦嶼又斗入海過大小筭管白
鷺水澳至南鎮門凡四十里州東之第三支沙也遶
其外者曰董江上接桐山溪過桐山溪至彩澳折而
南又斗入海歷大欄小欄流江象洋至沙埕而止凡
百二十里州東之第四支沙也遶其外為白水即浙
閩分界處矣自桐山又東則為分水關凡自州東以

至分水關皆迤邐而東北海疆時有紆直之異茲特
言其大較焉

福寧衛在州城中領操屯軍五千六百名

楊梅嶺舊產楊梅宋開禧寺僧始砌嶺路東抵五里
臺西抵十八溪宋嘉定中令楊志捐俸甃石亦號楊
公路

鼓鐘山在古縣村舊有鼓樓與山相連亦名鼓樓山
稍南為洪山勢極高聳遠望溫台如在目中相傳葛
洪煉丹於此故名石上有篆文六字人不能識

霞浦山下臨江水曰霞浦江即連江也有青黑元黃

四嶼日出照映江水如霞故名宋乾道間莊元美修
道於此見五色鸞鳥來迎遂羽化焉相近五里有牛
跡山兩嶺有坳相抱中函方窪如牛蹄之跡溪水至
此忽陷入地中伏流數十丈而復出漉漉有聲又有
小洪山絕頂天地廣二三畝四時不竭有龍居之其
旁為大小風門霧出即雨又有蓮花山五峰攢簇如
蓮花箭山麓有大小二石龜其色瑩白形體皆具首
尾欲動亦有坼文

竹嶼在海中脈出於洪山

小馬山之旁有四城山上有巨石黑色亦名鐵印山

硯石江亦即連江之委也江中有嶼其平如硯五代
周時有許光大者為沿海都巡檢江寇至光大戰歿
江水如血者三日屍隨潮歸鄉人立廟祀之

硯石之旁有東蚶西蚶更西為長興而地盡矣外一
小孤嶼曰蓮花嶼又西即白瓠山在海中當寧德之
金垂河口地分兩境以山脊為界自北面復轉而東
曰小青礁曰李園可復返於鹽田焉

漁洋埤有二小壘東出北稍短曰短表南稍長曰南
表自是而南為武曲臺又南曰高羅又南曰積石又
南曰斗米亦稱斗美折而西曰大金所有城故設操

屯軍千一百二十名其山曰南金山廣袤二十里昔有海客至此館於逆旅遺金二餅而去逆旅兄弟二人追十里還之客大詫曰君非常人也異日聲價當比南金因以為名宋時有鄭轅以理學稱又有鄭君老十歲能詩舉咸淳進士山上有江王廟相傳始於唐時其像本自海浮來是夕見夢於里人曰吾台之黃岩人也姓江名清里人遂刻木而祀之於此其南又有小金山支峰曰劍峰而文崎武崎二山隔水相向相去五里擁抱左右上有玉井峰鐘冠峰羅漢岩金牛跡桃花塢梅花坡遠望之縹緲如雙螺焉當其

前者為筆架山在海中以形似得名明嘉靖四年四月土人見五山自海浮來止於筆架之外峰巒明厯上有草木人馬往來貿易如織萬衆聚觀良久而散蓋蜃氣也其旁萊臺下有龍潭邏海者必屏息過之噤不敢譁萬厯間一守備以為妄也鳴金鼓舉砲自若俄而龍起覆溺焉筆架之內兩峙之間曰鴨池以山島四遶風恬水澄如鸞鴨之池也衆險之中以獨安為竒云自大金而西曰閩峽堡故於此設高羅巡檢司又西曰羅浮相傳此山浮海而來泊船止利北風若遇南風則石崖齒齒不可近旁立石筍山脈屬

於閭峽登之可以遠眺中有清泉一泓上往大金下
達西洋各半潮水西南風四更抵東湧三更抵礪山
自羅浮又西為小柘洋又西為下澚故於此設延亭
巡檢司又西為延亭更西為砦頭幫而地盡焉相傳
砦山為七佛所居其地峻岩一名峻灘有二大石相
疊一人撼之即動衆撼之反不能動旁一石筍高十
餘丈凡自大金已西山徑險仄狼虎反縱人跡罕至
也
芙蓉山在閭峽之南海中周二十里可泊北風船五
十餘亦有龍潭舟過不可舉砲

馬砌山在芙蓉南海中周十餘里可泊北風船二十餘上距大金下距西洋各半潮水

盛山在馬砌南周七里可泊南風船十餘以上三山皆賊藪也更南即西洋山矣

相近大金海中有浮瀛山一名浮膺山上有四澳宋元間居民蕃庶鎮北大將軍林國祥居此明初內徙松山港昔時風濤險惡歲患溺舟其後流沙漸合始成通港山之南有清潭寺隋開皇中梵僧闍那嵐多建山上有廟相傳其神姓趙名昱蜀之青城山人仕隋為嘉川守斬蛟拯溺蜀民祀之灌口宋開慶初復

廟於此元至正間州大飢神化形為估客附米舶至
閩謂舶主曰此米至松山必大售利且十倍我為若
先馳往告彼中牙僧令聚貲以待且授以握中扇曰
若至彼津渡有詰問者以此為驗言訖遂去是日松
山人夢神告曰米至矣有項舶果至舶至具言所以
來且出扇以示松山人視之則廟中塑像所握扇也
乃益大驚成化九年移烽火寨於此初設於三沙外
之烽火山海島也置欵總一員戰船四十三隻兵九
百五十三名後以險遠而內徙焉澳內南北風船俱
可泊但苦潮退易膠外對海中火焰山更出為長表

短表折而南為筍竹洋惡礁鱗布柁師苦之夏至後
陰陽相薄沙濤湧沸土人謂之海動雖魚艇不敢出
也北至浙之蒲門南至連江之濂澳近則礪山大金
羅浮箬頭延袤三百餘里皆其汎地也其會哨北會
浙船於井下門南會小埕寨於西洋山嘉靖中把總
朱璣以汎地遼濶請分兵船為二一泊官澳一泊崙
山萬厯間復增中哨以守三沙焉

瓜嶺一名深澳嶺宋孝子王薦居此母沈氏冬月病
渴思瓜不得薦至此嶺遇雪仰天而號忽見石岩間
青蔓披離有二瓜摘歸奉母而疾差明太祖載之御

製孝順事實中嶺畔有馬仙巖相傳仙人馬姓者居此頂有穴泉隨所至人數恰可給飲嶺東有東岩岩左有龍井雲氣嘗蒙其上右有池曰鳳池

赤岸唐林嵩居此登乾符中進士詞賦為一時之冠觀察使李晦奏改其鄉曰勸儒里曰擢秀以旌之又

有文翁龍首二橋皆以嵩得名也其地又為紙衣道者墮水處道者為周顯德間人清潭謝氏子出家名義韶居常不食以紙為衣一日赴齋赤岸被人推墮深潭中咸以為死矣及至齋所則道者先在紙衣亦不濕也柘洋水坑平嶺諸溪皆至赤岸又有倒流溪

亦西流合於赤岸赴海

後崎山與松山夾港對峙全體皆石磊砢奇秀唐乾符中有陳蓬為白水仙者居於此能詩嘗題所居云竹籬疎見浦茅屋漏通星與林嵩友善宋紹聖間邑宰熊浚明作邑誌言嵩曾孫仲荀有地里志得之黃忠黃忠得之白水仙云 三沙上有土堡明時居民三百餘家澳內可泊東北風船三百餘賊所窺伺此時常設陸兵一營駐守為福清上游最要之地舊烽火在三沙南海中周十餘里明時有居民三十餘家原設寨總公署徒後撤之澳內可泊南北風船

六十餘

崙山在海中舊烽火東二山相連高者曰大崙山周四十餘里外隆而中窪如盈盃故舊名盃山有三十六澳昔多居民洪武中內徙萬厯年勘丈得荒田三十餘頃擬設屯墾而中止僅為漁戶所居有媽宮地產鹿澳內可泊北風船六十餘在南者曰小崙山多鹿不可泊船二崙皆烽火三沙屏翰也舊設游總一員戰艦二十二兵五百十四名以守之與臺山遊相策應北路參將汎時駐此旁有艮山有嶼曰日嶼或作

日嶼新圖有
大日小日

七星山在海中崙山之東七嶼羅列故名七星可寄
北風小船十餘自官澳鎮下門放洋或自崙山放洋
合三更可至

礮山在大金東海洋中有南礮北礮東礮西礮亦作
桑山音相近也東礮泊北風船二十餘北礮泊北風
船五十餘南礮泊南風船二十餘中多惡礁過者宜
慎西北南風俱自鴨池放洋二更可到東北風自三
沙放洋三更可到倭寇自北來者嘗至此分鯨萬厯
未設遊兵統十二舟守之以不能久泊而撤
楊家溪中有九里潭自漆溪泥溪至此凡九里過黎

智墩而入海

太姥山高十餘里在州東已百餘里矣舊名才山今置戍有材堡與之相近太姥者堯時種藍嫗也好施與遇仙人授以丹藥服之以七月七日騎龍上升後人名其地曰摩霄峰又有太姥墓在岩洞前一石跌類龜背豎石塔乃太姥既上升而後人思之葬其衣冠也藍溪源出山頂即太姥種藍處每八月烏柏葉落水中作凝碧色俗傳為太姥染衣居民候其時取水漚藍染帛極佳唐乾符中僧師待建國興寺咸通初林嵩建草堂讀書其中遺址尚存嵩記云山舊無

寺僧師待始築居於此乃圖其秀拔者為三十二峰
自後精藍鱗次遂成遊觀之區矣遊太姥者東南入
自金峰菴東入自石龍菴即疊石菴又山外小徑自
北折而東亦入自石龍菴西入自國興寺寺西有塔
北入自玉湖菴菴之東為圓潭菴國興寺東岩石尤
竒有萬丈崖崖上為望仙橋橋西曰白龍潭有龍伏
焉洞中鼕鼕如鼓聲潭之西曰曝龍峰峰上曰白雲
寺又上曰摩尼宮後有頂天石石有巨人跡二可長
二尺山高風寒夏月猶挾纒樹木無過四尺者石皆
駁瘃秋霽遠望可盡四五百里雖浙水亦在目中乾

符六年記

激城堡下有激溪納秦溪藍溪諸水宋有林守真者
自言永嘉人敝衣蓬垢日醉酒肆中或數日不食亦
無饑色一日忽作百人之饌集諸道侶夜分舉手謝
曰先行矣瞑目而化案有遺札曰得行便行得去去
明月清風為伴侶火浴有異香鶴舞之應塔於龍澗
之上

秦嶼堡有大竇當巡檢司牙裏堡即牙城也有青灣
巡檢司桐山堡在廉江里十七都有蘆門巡檢司下
有桐山溪其出海處曰董江相傳董奉煉丹山中嘗

就此澡浴也山之東有雙髻峰又有形若龜者曰龜峰山北有岩如伏虎曰白虎岩宋高曇居此山下孝宗朝為秘書省著作郎曇號容齋光宗嘗書容齋二字以賜之又有高融者登乾道進士棄官而隱於此作無餘草堂

沙堤北鄰浙省之蒲門所澳內可泊南北風船三百餘浙省商賈於此鱗集互易所齋兩省一大都會也倭寇嘗窺伺之舊於此設陸兵一營其地有黃崎山面大海海中屏風山當其前朱文公避學禁常隱於此作中庸序書其藁於民家白板扉上後此扉昇入

州庫奉為世寶焉

屏風山在崙山之北南來商船皆自此收澳實蓄秦
嶼入都青嶼皆為賊衝恃此扞之嘉靖三十八年四
月海寇洪澤珍引倭入寇攻福寧州分守叅議顧紳
固守五晝夜得不陷賊移攻福安縣破之叅將黎鵬
舉率指揮盧鼎臣等大敗賊於屏風嶼又追之鎮下
門獲其四舟賊燬巢遁去

臺山在屏風山東周十餘里秀聳若臺故名水深五
十餘托澳內可泊北風船五十餘上有娘娘宮往時
倭寇自日本或南麂來者皆就汲於此八閩上游第

一門戶也萬曆三十五年置游總一員率戰艦十有八兵六百十九名以守之以澳中不利南風不能久駐名守臺山實居官澳耳西北風由官澳鎮下門放洋二更可到南風由崙山放洋三更可到

鎮下門在屏風山之北故有居民千餘家委稅官以蒞之澳內可泊北風船百餘北至官澳南至三沙各一潮水

官澳在鎮下門之北蒲門所之東為浙閩分界之地澳北泊南風船四十餘為溫屬金盤汎澳南泊北風船五十餘臺山游哨所轄也故為賊所時窺最稱衝

要

分水嶺在廉江里十九都浙閩分界處也下有白水江判隔兩省海外夷人雜居閩島者有七種一曰盧亭曰水郎則在此江之上盧猶遺種也詳見粵紀中其餘又有樂山莫徕遊及般子山夷雲家之屬

丁亥復至會城

五月癸巳朔集諸公會議於公署五日而後定

壬寅促裝登舟行十里止虹山橋會同侍郎蘇學士石主事殷御史張靖海將軍施將軍佟巡撫金都統胡於行帳拜疏曰臣等先在廣東恐誤福建農時已經咨行

福建撫臣將沿海應給民耕種田地即與耕種令其復業後於四月初二日行至閩境復將

皇上愛民至意通行曉諭仍會同該撫遍詣沿海地方萬姓歡呼咸稱向來雖經展界仍有海寇未得安寧今賴

朝廷德威海寇已除復沛

綸音給還原業小民自此世世得沾

皇上洪恩擁馬焚香沿途不絕查福州興化泉州漳州等四府福寧一州所屬十九州縣原遷界外田地共二萬五千九百四頃零自康熙二十年展界至二十二年

止已經墾復四千八百八十六項零尚餘未墾田地二萬一千一十八項零并額外老荒七百項零共二萬一千七百一十八項零並交地方官有原主者令其復業無原主者招徠勸墾據州縣陸續呈報歸業丁口四萬八百有零承墾田地一萬七千一百三十二項零其丁口花名及拋荒老荒數目并鹽田竈田屯田分晰數目聽該府造冊另報令其照例起科其沿邊所有漁課鹽課已經原任總督姚啟聖於康熙二十年題准開復現在徵收應無庸議惟海禁仍行禁止至於沿海地方先因遷民立界徧造墩臺各設防兵或五名或十名或二

十名自廣東交界至浙江交界止有防兵八千八百一十一名今海寇已除遷界已復沿海田土已經給還應將不緊要處兵丁歸併緊要處臣等議得南澳一島係閩粵二省咽喉門戶應設水師重兵先在粵中原請至閩定議今查海澄廈門已有水師提標官兵分駐而復有專鎮廈門總兵官領官兵三千員名可以移調應將此兵移駐南澳聽兩省督提管轄於詔安營撥守分水關梅嶺寨各把總一員兵五十名洋林村把總一員兵一百名於銅山營撥守懸鐘所遊擊一員兵五百名於雲霄營撥守梅州把總一員兵一百名荷步把總一員兵

五十名漳浦縣已有漳浦總兵領官兵三千員名復有
城守叅將領官兵一千員名應將城守營裁去止留總
兵營仍於其中撥守眉田寨連江各把總一員兵一百
名東墩赤湖各把總一員兵五十名銅山已有水師總
兵嶺官兵三千員名復有水師遊擊領官兵一千員名
查銅山逼近南澳南澳既宿重兵銅山之兵可以裁省
應將水師遊擊一營全裁其總兵所領官兵亦裁去三
分之一兼裁總兵官止留遊擊二員守備二員千總四
員把總八員兵二千名另設副將一員以統之即於其
中撥守八尺門杜濤各把總一員兵五十名古雷千總

一員兵二百名六鰲所守備一員兵五百名海澄縣係
緊要之處所設副將一員領官兵二千員名應留於水
師提標撥守石碼遊擊一員兵三百名海門千總一員
兵一百五十名橋梁尾高崎劉五店各把總一員兵一
百名金門係緊要之處所設總兵官領官兵三千員名
應留其附近處水師浯嶼營圍頭營各設遊擊各領官
兵一千員名查二汛逼近金廈金廈既有重兵二汛之
兵相應裁去於金門營撥守圍頭將軍嶼等處遊擊一
員守備一員千總二員把總四員兵八百名鎮海衛千
總一員兵三百名再於水師提標撥守浯嶼千總一員

兵二百名於漳州營撥守江東橋把總一員兵五十名
同安縣在金厦之内所有城守營副將一員領官兵二
千員名可以減省應將官兵一半及本副將裁去止留
遊擊一員守備一員千總二員把總四員兵一千名即
於其中撥守下店寨把總一員兵五十名於陸路提標
撥守竿頭寨把總一員兵五十名洛陽橋把總一員兵一
百名於泉州城守營撥守安海橋把總一員兵五十名
於晉江水師營撥守永寧崇武各把總一員兵二百名
於惠安營撥守黃崎把總一員兵五十名興化府已有
總兵官領官兵三千員名復有城守營遊擊領官兵一

十員名應將城守營裁去止留總兵營即於其中撥守
楓亭寨把總一員兵一百名天馬寨江口寨各把總一
員兵五十名再於平海營撥守湄州守備一員兵三百
名三江口千總一員兵二百名於福清營撥守蒜嶺把
總一員兵五十名海口寨千總一員兵一百名海壇係
海島重地所有水師總兵官領官兵三千員名應留查
本營向駐鎮東今應責移海壇於長樂營撥守壘下石
龍臺各把總一員兵五十名於福州城守營撥守烏龍
江把總一員兵一百名閩安鎮海口要衝省會東南門
戶所有水師副將領官兵三十員名應留於連江營撥

守東岱定海各把總一員兵一百名拱頭寨把總一員
兵五十名於閩安水營撥守小埕千總一員兵三百名
下嶼北交等處遊擊一員守備一員千總二員把總四
員兵一千名於羅源營撥守松山飛鸞各把總一員兵
五十名於福寧營撥守馬鞍山松山港口各把總一員
兵三十名金垂東臺金垂西臺東墘鹽田下許各把總
一員兵五十名白石司大金各千總一員兵一百五十
名於閩安水營撥守秦嶼遊擊一員守備一員千總二
員把總四員兵一千名於桐山營撥守牙城把總一員
兵五十名沙埕分水關各千總一員兵一百五十名共

撥兵丁九千五百一十名仍聽各營照舊管轄其應裁
銅山總兵陳昌現在征進臺灣俟回日該將軍令其赴
部候補改設銅山副將一員聽部照例推補其銅山遊
擊一員守備一員千總二員把總四員兵一千名銅山
城守營遊擊一員守備一員千總二員把總四員兵一
千名浯嶼營遊擊一員守備一員千總二員把總四員
兵一千名圍頭營遊擊一員千總二員把總四員
十名漳浦營參將一員守備一員千總二員把總四員
兵一千名同安營遊擊一員守備一員千總二員把總
四員兵一千名興化城守營遊擊一員守備一員千總

二員把總四員兵一十名共官兵七千名應裁但現於
經制兵丁內撥官兵一萬駐札臺灣澎湖不便遽裁俟
該將軍撥定之後將餘剩者具題裁去所裁官兵內有
征進臺灣不必裁汰將陸營官兵裁去頂補可也

福建屯田明初設置旗軍領種與廣東畧同其後漸
廢半為民佔而虛額僅存 國初領于縣官照民則
徵收初遷界外甚多屢界後有福州府同知附徵福
右衛屯田一十九項零福州府通判附徵福中衛屯
田七十八項零興化府同知附徵興化衛屯田一項
零泉州府同知附徵永寧衛屯田三項零漳州府同

知附徵鎮海屯田四十四畝共一百一頃零併入
前拋荒額內其在各縣附徵者即纂入各縣拋荒數
內不另列

閩中鹽場有七在福州者曰海口場曰牛田場在泉
州者曰惠安場曰潯美場曰涵州場曰浯州場在興
化者曰上里場初遷多在界外今展復

是日將軍施娘巡撫金鉉提督萬正色俱至行帳北向
跪行請安禮且致辭望

闕叩頭別去

癸卯至閩清之溪口行五日

丁未過黯淡灘至延平府

己酉至建寧府溯流上瀨易舟以行是日過阿彌陀佛灘稱絕險凡行三日所過灘不可勝紀

壬子過六牙灘老虎口灘止大園

癸丑過老鼠灘太平灘止古廟灘

甲寅過將軍灘火燒灘止浦城灘

乙卯陸行五十里至漁梁又三十五里過五顯嶺又五里止廟灣是日過仙陽街真西山先生故里也在縣北三十里五顯廟規制宏壯踞山之巔萬竹圍繞間以長松蒼翠襲人衣裾飛流瀑布震盪於下行者至此每盤

桓不忍去

丙辰行十里過楓嶺為浙閩接壤處又二十里至念八都又十里至上竿嶺又五里至羊牯嶺又十里至仙霞關關有上下兩重中作漢壽亭侯廟石磴峻絕真天險也又十里至保安又五里至姚嶺又二十里至峽口丁巳行五十里至清湖登舟自此沿江入浙矣

梨嶺在乾封鄉之安樂里通衢之江山民以樹梨為業有水北流通廣信洪武間令張鵬舉置關於此表曰梨關正德七年以江西徭寇置戍焉唐歐陽詹詩曰南北風烟即異方連峰危棧倚蒼蒼猿咽木傍

高處誰不沾衣望故鄉明鄭善夫詩曰梨嶺遙於楓
嶺遙小關高比大關高傭夫過此如平地一日來回
一百遭

粵閩巡視紀略卷五

粵閩巡視紀略卷六

工部尚書杜臻撰

附紀澎湖臺灣

澎湖有三十六島縱橫三百餘里

此據新圖實錄云二百餘里閩

海實錄云其地勢在泉州料羅漳州鎮海之界與舊
嶼大擔相對自內地東渡順風一日二夜可至閩書
附晉江縣云地近琉球昔人于此置兵防琉球今則
防倭元島夷志云自泉州順風二晝夜可至有七澳
曹能始志勝云自郡東出海門舟行三日始至鄭若
曾云風順尚有日半之程指揮唐垣京澎湖要覽云

係琉球山川地界泉漳興福其去內地也埒于琉球
諸書所載不同茲從閩志附之晉江之後云前代事
不可考隋開皇中遣虎賁郎將陳稜帥師至其地虜
男女數百人而還唐施肩吾有澎湖詩云腥臊海邊
多鬼市島夷居處無鄉里黑皮年少學採珠手把生
犀照鹹水蓋亦嘗有至焉者明洪武五年以其民叛
服不常大出兵驅其大族徙置漳泉間今蚶江諸處
遺民猶存嘉靖之季賊首曾一本林鳳據為巢穴萬
歷元年總兵俞大猷逐倭寇嘗至其地二十年朝鮮
告倭且入犯議者謂不宜坐棄澎湖于是設把總一

員以十六舟戍之隸于南路叅將及泉南遊擊令與

浯銅二寨時相策應其汎地北起北山南盡八關澳

地圖作北山龍門港丁字門西嶼頭曰最衝娘宮前

蔣上澳曰次衝春汎以清明前十日為期駐三月而

返冬汎以霜降前十日為期駐兩月而返後以孤懸

海表議罷啟禎以後鯨鯢荐食益不可問矣其氣候

常溫多風少雨涉海者重絮而行既至則易暑服其

土燥剛不宜木與禾黍惟多雜茅泉味澀滷其民多

泉人僑處苦茅以居朴野多壽土布為衣耕漁畜牧

以自給煮海為鹽釀林為酒掇贏蛤魚蝦以佐食藝

牛糞以爨燃魚膏為油尤多畜羊羊特肥大孳生山谷間千萬為羣其主各刻角以誌或烙毛務耳夜亦不收卒不相亂也黠者或行賈于外致饒裕其爭訟擇年長者為主有事則就決之間有不能平則詣晉江縣陳白以聽斷焉其物產穀則胡麻菜豆藥則天門冬蒺藜山茨菇蟲獸則山猪蜈蚣花蛇及鼠山猪類常猪而色赤性矯健善跳躍捕之不易有毒食之輒發瘡癰花蛇蜈蚣彌山皆是花蛇大者長丈餘小亦不下五六尺晝日伏藏地下夜乃潛至几案間揣之不嚙即偶見嚙亦不至大創也海石間出烏魚一

名鯔魚本生江南每春日輒來就石廉打子蓋魚子
須跳擲乃出也又產白芥菜高五六尺其子中入藥
絕佳茉莉十瓣香尤酷烈又有藤蔓可為燂洗兵船
之用其民以地近琉球夜不舉火言夷船望見烟起
必來抄掠居中六澳曰娘娘宮可泊南北兵船五六
十艘遊總處之其餘諸島重疊相包無大高山望之
不過如覆釜水曰彭湖溝分流東西泉漳人行賈呂
宋必徑其間自此以東為順流其返也過彭湖而西
復為順流自娘娘宮而西至西嶼頭曰左哨稍南至
時上澳曰右哨二哨去中營各水程四十里二哨自

相去水程三十里西嶼頭有山稍高度可十六丈可

泊兵船四十餘其險阨曰內塹外塹稍北十里曰蟬

仔澳可泊南北風船十餘各有漁寮水源新圖又有

池角吼硫礮員門稍北二十里曰丁字門其澳迫窄

僅可容四五舟有水源無漁寮為寇夷樵汲所至新圖

有大吼門過此十里為西北大洋稍東二十里曰鎮

海港員背嶼各有水源漁寮新圖有赤墩萬丈潭土

嶼但水淺礁多舟不易往第于北山築墩探瞭而已

西嶼頭內十里曰菓葉澳可泊十餘舟有水源無漁

寮又自西嶼頭分道至通梁仔瓦碇港大礮各水程

二十里中墩三十里新圖菓葉甚遠中墩甚近各有

漁寮水源亦以水淺礁多止可遠瞭凡此皆左哨汛

遊所及也時上澳可泊北風船四十新圖其旁有

嶼嶼毒嶼西行水程五里有小嶼曰大城與小城相對

可泊南風船十餘自時上東北行水程二十里曰文

龍港即龍門港之誤可泊北風船十餘有水源漁寮

新圖其旁凌波嶼為寇夷樵汲必至之地哨邏至此

而廻稍南五里曰林投仔新圖其旁有鎖有水源冬

哨始有漁寮春夏無之也由此東北水程十里曰圭

壁港又北五里為青螺仔頭新圖其旁有洪林罩蚌

嶼嶼 各有水源漁寮但礁多水淺常于太武山遠瞻

廣 及之不能時往並時上而西五里曰楓櫃仔山新圖其旁

有大帽山沉礁四角 有水源漁寮北行水程二十里

嶼龜龍嶼番墓下 曰安山仔可泊南風船二十餘又北十里口東港尾

有水源無漁寮可泊南北風船二十餘新圖自此復近祖媽宮

左哨汎遊所及略盡于此西嶼頭之極西又有吉貝

嶼孤隔多礁新圖其旁有布袋澳沙員日嶼沉礁北

處 與南面之八鬮嶼遠隔一潮水雖有漁寮水源均

非哨瞭所及也新圖與舊略異娘娘宮作祖媽宮大

城太武山與之連壤不云小嶼也自祖媽宮稍西盡

西坡仔尾有新城蓋寇所築以屯兵者其旁有後屈潭水燒平牛

心懸而八關之旁澳嶼甚多在北者曰駕鴛窟捕魚坑水坡虎井桶盤嶼三

將軍石在西者曰大花宅小花宅嶼草嶼沉礁大

嶼鐵稍遠至西南有湖內社捷欽戎東北有尾嶼田

將軍柱極南有東嶼平西嶼平鐘嶼等更南有東吉

嶼西吉嶼斧頭爭等皆明世所不及知也

臺灣舊名東番不知所自始其人聚處無君長不通

中國亦未嘗屬于外番泉漳市舶私與往來不聞于

官司也萬曆三十年為倭所據浯嶼營將沈有容出

舟師擊之有連江人陳第者以薊鎮遊擊家居與偕

往共破倭泊舟大員其酋長大彌勒等持鹿酒以獻
 因備詢其上俗及山海形勢述之成篇第個儻能文
 起家諸生後乃去而習武為總兵俞大猷尚書譚綸
 所賞識遂以武秩進著有言謬言毛詩古音攷伏
 義先天圖續太史焦竑亟稱之自有第記而後釐考
 屬國者始知有所謂東番云其略曰東番在彭湖外
 洋中自列嶼航海一晝夜至彭湖又一晝夜而至加
 老灣其地起魁港加老灣歷大員堯港打狗嶼小淡
 水又有雙溪口加哩林沙巴里大幫坑皆其居也斷
 續凡千餘里種類甚蕃別為社社或十人或五六百

推子女多者為社長聽其約束性好勇喜鬪暇輒習
走晝夜不止足躡皮厚至數分履棘刺如平地捷及
奔馬度終日之力可踔數百里或兩社有隙而相攻
約日合戰戰已往來如初不復相讐每殺人斬其首
剔肉存骨懸之門門懸髑髏多者稱壯士地暖冬夏
裸體不知衣冠自謂簡便婦女結草裙畧蔽下體而
已無揖讓拜跪禮無歷日文字視月圓為一月計月
十圓為一年久則忘之故率不紀歲少壯老髦問之
不知也交易結繩以識無水田治畚種木山花開則
耕禾熟拔其穗穀粒視內地稍長持甘香採苦草雜

米釀之為酒間有佳者豪飲至一斗燕會則置大罍
團坐各酌以竹筒不設有核樂則起而跳舞口亦嗚
嗚若歌曲男子剪髮留數寸披垂女子則否男子穿
耳女子年十五六斷去唇兩傍二齒以為飾地多竹
大數握長十餘丈伐竹構屋蒙以茅廣長數丈每族
共屋一區稍大曰公廨少壯未娶者曹居之議事必
于公廨取名集之易也將娶視女子可室者遣人遺
以瑪瑙珠一雙女子不受則已受則夜造其家鼓口
琴挑之口琴者製薄鐵如搔頭尾有兩歧齧而噓之
錚錚有聲女聞納宿未明徑去不見女父母自是每

夜必來以為常迫產子女婦始往壻家迎壻如親迎
壻始見女父母因家焉養女父母終身其本父母不
得子也故生女喜倍男謂其可以繼嗣云妻死更娶
夫喪號為鬼殘終莫之醮人死擊鼓環哭置尸于地
四面熾火燭而乾之不棺屋壞乃立而埋之不封不祭
將耕戒勿言亦不復相仇殺道路以目田畔相遇少
者背立長者徑行無所問華人或故侮之不之較苟
違戒則歲輟不登故守之惟謹女子健作女常勞男
常逸有盜取人物者嚴剔之尸于市故夜戶不閉禾
積場無敢竊者有牀無几案席地坐穀有大小豆胡

麻薏苡蔬有葱薑番薯蹲鴟果有椰蔗毛柿佛手柑
畜有貓狗豕雞獸有虎豹熊鹿烏有鳩雉雉在山尤
多鹿人善用鏢鏢長五尺鏃甚銛虎鹿過之輒斃其
捕鹿嘗以冬伺其羣出乃集衆逐而圍之掩羣盡取
積如邱陵先屠取其皮角次腊其肉次腊其舌與腎
與筋別藏之盛以箱而鬻之華人又能榨蔗為糖二
者其本業也得鹿子必擾馴之刺鹿腸出新飼草未
化者必競食名百草膏俗食永不食雞雉惟拔取其
尾以飾旗見華人烹噉雞雉輒嘔雖居島中不能操
舟畏見海但捕魚于溪澗故老死不與他夷往來永

樂初鄭和航海諭諸夷東番獨遠竄不聽約于是家
遺以一銅鈴使懸于頸蓋狗畜之也至今傳以為寶
始皆聚居濱海嘉靖末遭倭焚掠乃避居山倭善鳥
銃鏢不能禦也自通于中國獨見其居山耳漳泉之
民至者既眾克龍烈嶼諸澳往往能譯其語嘗以瑪
瑙瓷器布鹽銅簪環之屬易其鹿脯筋角間遺以故
衣輒喜見華人則衣之以相晉接退則襲而藏之得
布亦藏之蓋其人習裸不耐冠履束縛也性頗醇樸
自通中國始有嗜好奸人又始以濫惡之物彼亦漸
悟知為巧偽矣第之言如此明季阻于海寇不復相

通不知何時為紅夷所得海逆鄭成功之敗遁于京口也乘大霧襲殺紅夷守者而據其地築城以守偽號東寧國或言歲以十萬緡歸紅夷而假其地以居為日久矣卒莫知其然否後鄭成功死于廈門其妻董氏復立于錦勢益弱降者踵至爭言臺灣中曲折始知其地南北長東西狹東面皆大山莫知其窮際水皆西流長者或數百里海逆既定居規度便近地給兵屯種而收賦于諸社以自給又多種桐樹及菓麻為沿船之需或盛言封畛遼闊獠人錯居多奇怪有三指人爪銳如鳥跳躑山林如猿獍居于樹顛樹

絕大其顛平廣可置屋其人亦能耕獲得穀輒徙置
樹上又善弩人迫之輒注矢下向終莫能近也又有
長髯矮人僅如十歲小兒而鬚皆過腹或又言其巢
特險固水道紆迴惟一徑可入欲往者必自彭湖易
舟而令諳習者為導乃能至或又言也時時震又多
颶風屋易壞多至三年必再構矣言人人殊亦有圖
形以獻者事涉詭詐不足信也迨海逆入居漳泉再
道于廈門而錦又死獨稚子克塽在悉以兵事委其
偽武平侯劉國軒而專總財賦則屬之偽忠誠伯馮
錫范錫范者克塽妻父也于是督臣姚啟聖提臣施

娘哉咸言臺灣可取狀上命會議有

旨允行康熙二十二年春娘自闕下至閩啟聖已調集
各鎮之師飭軍資峙糗糧列艦以待官軍在行者皆
有重犒師行以風不利而返再出復却回六月啟聖
親餞娘于銅山從容言曰將軍師期已三易矣每行
必竭屨庀軍賞力已盡矣嗣後不能為將軍再治行
敬奉白簡以待命于下吏克敵與否在今日矣惟將
軍圖之娘念時方盛暑多南風意躊躇未決乃業已
力任而啟聖繩之又急遂慷慨行為書決別妻子誓
必死諸將士當行者皆作書抵家處分後事無一還

心合提標及興化平陽銅山金門海壇廈門諸鎮之師共數萬人舳艫數百禡牙舉帆自銅山南向而啟聖亦進屯廈門為聲援煨舟既至大洋風日恬和海波偃息安行如內地遂以初十日至澎湖之外島當是時賊將劉國軒以二萬眾守澎湖昔日哨避重地皆為所據煨泊舟處非向來屯駐地也賊望見之皆大笑曰此不足煩吾兵潮至自碎耳蓋海道收泊有常處必澳曲乃可以避風潮否則潮乘風勢能舉舟拍沙上即至堅之舟不過三四掀播無不震裂矣煨亦習知海事心竊危之顧無可奈何稍擇便處相守

十二日潮竟不至而天忽大霧咫尺不見人是為六月二十二日也娘告諸將曰潮汐有常而十二日不至方夏多颶風而無風此天相我成功也非

天子洪福不及此然倖不可屢邀更需時日而潮至颶作必敗無疑矣今日請與諸君共破賊諸將亦以為然請舉砲娘曰不可火器彼之所長彼聞砲聲即知我軍所在而擊聲以擊我我不能敵也不若乘大霧未解而直趨其中堅彼不意我至必驚亂我躍登其舟短兵相接庶可取勝眾曰善于是分其舟為二以興化總兵吳英為左冲鋒金門總兵陳龍銅山總兵

陳昌繼之而廈門總兵楊嘉瑞當其後平陽總兵朱
天貴為右冲鋒提標前營遊擊何應元提標署中營
叅將羅士珍提標右營遊擊藍理提標署後營遊擊
曾成繼之而海壇總兵林賢繼其後偃旗卧鼓魚貫
以入餘舟八十艘留為後應軍方行而潮至水驟湧
四尺舟行通利無礙娘與諸將皆色喜度已附賊舟
競擲長鑱巨鈎首尾鈎之我舟與賊舟相混糾結不
可解朱天貴林賢吳英先登諸將士奮勇騰躍競上
賊艦賊方茫昧不及辨而力已及身大亂趣舉砲鉛
甫脫口鎔而未堅勢亦不猛着鐵皆如泥不能傷我

軍我軍大呼殊死戰無不一當百因縱火焚其舟自
已至未賊大賊殺死焚死跳溺死者萬二千人獲賊
舟甚多劉國軒以數舸逸去餘創殘八百人並詣軍
前降朱天貴冒矢石負重傷所當賊十二艘焚溺幾
盡猶稱寧死不退追擊不已忽有飛砲中項立斃天
貴本浙鎮以留後策應調之乃自願為前部卒戰死
時論壯之賊守山者曰偽將軍楊瑞見水軍已敗率
偽官一百六十五員偽兵四千六百五十三名全軍
降初煨將出師夢觀音授以水一桶覺而曰水者海
也一桶者大一統也我今茲必破賊乎又軍士有宿

子關忠義廟者忽聞空中呼曰選大纛五十杆助施
將軍破賊娘聞之益自喜至是果驗娘得降者皆厚
撫之錄所獲水軍創殘八百人給以糜粥酒葢遣醫
為裏傳藥名見之曰若等欲歸乎皆叩頭言逆天宜
死不死足矣安望歸娘曰不然汝一軍盡歿父母妻
子必謂汝等已死日夜悲泣今縱汝歸復見父母妻
子寧不甚樂

朝廷至仁如天不得已而用兵降即赦之耳汝今歸為
我告臺灣人遠來降尚可不死少緩即為彭湖之
續矣諭訖而遣舟歸之八百人皆感泣去既至則展

相告歡聲動地諸偽將偽兵聞之爭欲自拔來歸禁
之不能止劉國軒自澎湖敗還固已膽落至是見人
情大率已解散始決計勸壞克歸附矣始娘告捷且
言臺灣海道紆迴南風狂湧須俟八月以後乘北風
而行且遣書咨之督臣啟聖啟聖以為賊已大創宜
乘勝急繫若少遼綏之令賊得保聚勝敗未可知也
又廉知官軍破賊後藥彈火器幸已罄盡甚至撞毀
鐵鎗為裝砲之用遂為書報娘言當速進且送角弓
五百張柳箭二萬枝火藥二萬觔火礮一萬五千筒
噴筒三千枝火箭八百箱黑鉛四千觔大小鐵子壹

千枚出窩蜂子一千勛緞袍袍掛乾練袍各數千領
鞞帽若干件賞功銀一萬兩娘得書大喜悉以諸資
具散之軍中軍中人人鼓勵計日渡海滅殘寇取重
賞賊聞之洵懼閏六月初八日偽藩鄭克塽遣偽官
鄭年英林惟榮會蜚朱紹熙齎降表至軍前請舉國
內附為東方屏翰告告之曰仍居故士不敢擅許審
欲降者當加幕府約因要以三事一必須劉國軒馮
錫范親身來二必須納土獻版籍三必須為官兵遵
制剃髮舉家內徙聽朝廷安插使人銜命去七月十
五日克塽復遣偽兵官馮錫珪偽工官陳慶煒劉國

軒親弟偽副使劉國昌馮錫范如
同前使曾蜚朱紹熙來復奉書
言南北淡水駐防偽左武將軍
等已撤回地方並已效順但請
而何祐等降款亦至十六日提
韓於軍前而令侍衛吳啟爵六
示五通與錫珪等偕往曉諭臺
天使渡海合境驩呼投戈剃髮向
降表至奏繳偽延平王印一顆
一顆偽忠誠伯印一顆盡籍其

百萬為圖以獻但以宗族類多齟齬南人不諳北土請就近安插娘為代奏廷議許之於是克塽及偽將士等盡納其器仗於軍前舉族內徙提督娘身自渡海行定新附地而絕域盡入版圖矣是役也

天子念渡海遠戰將士勤苦賞卹皆從優厚提督娘授靖海將軍世襲罔替死臣鎮臣朱天貴特贈太子少保授一子為廕生餘將士陞賞有差以劉國軒率先歸順授為天津提督克塽至赦其罪優以公秩官京師而臺灣置郡縣如內地焉按圖東境果有連山而臺灣城則西面海中一孤嶼也稍近南城之西皆大

海而沙線重複舟不可近城之南一沙埂屬於內地
曰萬丹湖湖之旁有港東入曰蟻港即陳第所謂堯
港也埂上置七崑身崑身者山阜之名列兵守之如
內地斥堠也城之東乃大海澳沙埂遠之城之北有
水徑曰馬沙溝紆迴以入於澳地近澳之口曰鹿耳
門築城守之澳縱廣可數十里兵船宿其中由此乃
可以至城之東而登岸焉馬沙溝外又有沙線數重
置南北崑身以守寇所倚為奇險者在此也自馬沙
溝西南有孤嶼曰海翁涵為走彭湖道澳之西岸有
城曰墩蓋亦寇所築城之南有十二街有文廟旁有

港不知名北有花園花園旁亦有港疑即陳第所謂
大員港也城之東有天興萬年二州有內菜園有嘉
祥長治維新三里有二層營蓋皆寇所規度為營田
處也又東有上港岡中港岡下港 即林大岡山小
岡山大香洋小香洋中洲仔柳仔潭柳仔林沉
仔自是極東曰啞猴林即大山窮處自赤墩城南行
一百四十里至赤山仔稍西為鳳山港又西近海為
打狗山即陳第所謂打狗嶼也寇置砲城在焉其旁
有半
平山四底山觀自赤山仔又南八十里至上淡水又
音山大宅基二十里至下淡水此所謂南淡水寇置戍處也陳第
謂之小淡水自下淡水十五里至力力社又十五里

至茄藤社又六十里至放索社又八十里至茄落堂

又一百二十里至浪嵩社自赤墩城至此共五百三

十里南路盡處矣近海處曰沙尾岐頭小琉球在其西南而淡

水之東有傀儡番在大山中亦號令所不至也自赤

墩城北行歷大橋小橋二港皆經鬼橋其港為一百

二十里至新港社新港西行出海口有目茄洛灣即

陳第所謂加老灣也港北有名籠社黎頭標社有大

處其北又有歐王溪歐王社在其旁又有大小自新

港社西南五十里至麻豆社水西出曰莽港即陳第

所謂魁港也其旁有茄哩嶼雙溪口皆第記所有自

此以北第不及知矣又有大龜肉鐵線橋急水溪赤山自麻豆社東

行九十里至朱羅山其旁有啞里山倒洛水西出曰

蚊港其旁有三疊溪牛朝溪八掌溪上姑東自朱羅

山北行一百里至他里務其旁有猴悶社石龜溪大

六又北一百二十里至大武郡水西出日磚仔坵其

有東螺社西螺社南社二自大武郡又北六十里至

林三林臺仔坵冷飯坵自大武郡又北六十里至

半線社水西出曰大肚溪其海口日鹿仔溪其旁有

大肚社啞捉社自半線社又北一百一十里至水里

社皆地之東境至此乃折而西行三百里至大甲社

又西一百四十里至房裡社又西一百三十里至吞

韶社其水之西出者曰大甲溪其旁有雙寮社崩山社兜里社茅干社

自吞韶社折而西北一百三十里至後籠社又二十

里至新港仔水之西出者曰後籠港旁有茹世自新

港仔北行四十里至中港社中港出焉又北一百里

至竹塹社竹塹港出焉又北二十里至眩眩社又北

二百里至南炭社南炭港出焉其旁有霄里查內內社龜崙社坑仔社

折而東八十里至八分里社旁有奶社又東過江十五

里至淡水城此所謂北淡水也亦置戍為北面重

鎮江源有二皆出於東境大山峻灘斗瀉一經首冕

社一經房是仔社皆西流至外八投社而合合處有

峭壁夾峙於江之東西曰千豆門江自此折而北入

於海

在江南者曰擺接社瓦裂社龜崙社里末社在

兩江中者曰蒼厘社奇孔子社巴浪泉社在江北者曰麻里則孝曰荅荅故曰

自淡水城東三十里

至奇獨龜崙社又東六十里至龜州社有龜州山礮

山又東六十里至大屯社又東四十里至小雞籠自

中港社至此皆濱海西北境小雞籠外大海中有二

石對峙曰旗杆石寇熾時策取臺灣者嘗欲自鷄籠

趣淡水掩賊不備為奇功即此地也其地有支龔斗

入海必踰此乃可前土人之跳石凡一百五十里

至金包里外社又東十里至金包里內社又有支龔

視前更大跳越較難曰火大石凡行二百里至雞籠頭過江二十里至雞籠城自此以上無路可行亦無坡灣可泊候夏月無風用小舸循海墘而行一日至山朝社又三日至蛤仔難社又三日至哆囉滿又三日至直脚宣直脚宣以上人跡不到矣自赤墘城至雞籠城二千三百十五里朝議卒按圖設府一縣三曰臺灣府曰臺灣縣曰鳳山縣社力力社眩眩曰朱羅社皆有鳳山

縣

粵閩巡視紀略卷六